


卷五十二
人物



漢書門	九	漢書門
類	一〇八	類
號	三四	號
函	一	函
架	三	架
冊	三	冊

內閣文庫
九
三
七

內閣文庫	
番號	漢 9083
冊數	32 (21)
函號	292 13



蘇州府志卷第五十

人物四

吳縣

宋

程師孟字公闢吳人景祐元年舉進士甲科累知南康軍楚州

提點夔路刑獄歲凶以常平粟振民不足即發他儲吏懼白




不可師孟曰必俟報餓者盡死矣竟發之徙河東路晉地多

止山旁接川谷春夏大雨水濁如黃河可灌溉師孟出錢開

渠築堰淤良田萬八千頃裒其事為水利圖經頒之州縣名

為度支判官知洪州積石為江隄浚章溝揭北閘以節水升

降後無水患英宗即位召判三司都磨勘司接伴契丹使蕭



蘇州府志 卷五十一 人物四

惟輔曰白溝之地當兩屬今南朝植柳數里而以北人漁界
河爲罪豈理也哉師孟曰兩朝當守誓約涿郡有案牘可覆
視君舍文書騰口說遽欲生事邪惟輔媿謝出爲江西轉運
使盜發袁州州吏爲耳目久不獲師孟械吏數輩送獄盜卽
成擒加直昭文館知福州治行最東南徙廣州州城爲儂寇
所毀他日有警民駭竄師孟在廣六年作西城及交趾陷邕
管聞廣守備固不敢東時師孟已召還朝廷念前功以爲給
事中集賢殿修撰判都水監賀契丹生辰至涿州契丹命席
迎者正南向涿州官西向宋使介東向師孟曰是卑我也不
就列自日昃爭至暮從者失色師孟氣益厲叱僮者易之于

是更與迎者東西向明日涿人餞於郊疾馳過不顧涿人移
雄州以爲言坐罷歸班復知越州青州遂致仕以光祿大夫
卒年七十八師孟累領劇鎮爲政簡而嚴罪非死者不以屬
吏發隱摘伏如神得豪惡不逞者必痛懲艾之所部肅然洪

福廣越爲立生祠

宋史

張詵字樞言父沔浦城人刑部郎中直史館致仕來寓蘇州因

家焉

史但言浦城人此本盧志

詵第進士通判越州民患苦衙前役詵科

別人戶籍其當役者以差人錢爲雇人充皆以爲便知襄邑
縣擢夔路轉運判官錄闕土功加直集賢院改陝西轉運副
使召對帝曰朕未識卿每閱章奏獨卿與蔡挺有所論請使

蘇州府志 卷五十一
人了然等當以帥事相屬及入辭賜服金紫明年直龍圖閣
知秦州前此將吏貪功多從羌地獵射因起邊患詵至申令
毋得犯獲一人斬諸境上羣羌感悅遷天章閣待制知熙州
董璫遣鬼章逼岷州詵往討董璫迎戰破之于錯鑿城斬首
萬級元豐四年加龍圖閣直學士知成都府徙杭州將行復
命權知熙州經略熙河事會靈武師罷乃赴杭道京師帝訪
以西事對曰彼勢雖弱而我師未銳邊備未飭願以歲月圖
功累官正議大夫卒年七十二詵性孝友廉於財平生不殖
田業既建拓瀘夷地進用後雖有善言可紀終不追清議云
以上弟詢字仲謨元祐中知湖州歷戶部員外郎直龍圖閣
宋史

官至朝議大夫孫公秀字仲實從葉適遊風流詞翰推重一
時紹興初為崇德丞知臨海縣尤有善政

盧志

崇大年字靜之慶歷中擢進士第知青田縣民貧無以納和買
大年悉令候冬熟州符督責追杖縣吏大年曰年凶民飢若
催督必破產雖杖胥吏三五輩尚可寬一邑之民至冬民輸
無不足者徙知浦城縣舊設兩棧民以事追去無輕重悉置
棧中大年曰此牛馬吾民悉命撤去以疾丐分司歸吳日與
程光祿諸公觴咏燕遊號吳門十老大年德守淳固志尚夷
曠恬于勢利浩然易退吳士自陳之奇後大年繼有賢稱卒
年八十二朱長文與鄉人議諡謂黔婁諡康陶淵明諡靖節

大年當有道之世秉難進之節仕而知止貧而忘憂凜然有古高士之風乃諡曰康靖先生

吳郡志

侍其沔字國紀上世自高密徙吳沔為學貫穿經傳與人交殊淡薄遇其急奮義以往不避艱險五舉禮部退為鄉先生治平三年沒門人弟子相與議其治行諡曰夷晦先生

吳郡志

范純佑字天成仲淹長子性英悟自得尚節行方十歲能讀諸書為文章籍籍有稱父仲淹守蘇州首建郡學聘胡瑗為師瑗立學規良密生徒數百多不率教仲淹患之純佑尚未冠輒自入學齒諸生之末盡行其規諸生隨之遂不敢犯自是蘇學為諸郡倡寶元中西夏叛仲淹連官關陝皆將兵純佑

與將卒錯處鈎深擿隱盡得其才否由是仲淹任人無失而屢有功仲淹帥環慶議城馬鋪砦砦偏夏境懼扼其衝侵撓其役純佑率兵馳據其地夏衆大至且戰且役數日而成一路恃之以安事父母孝未嘗違左右不應科第及仲淹以讒罷不得已蔭守將作監主簿又為司竹監以非所好即解去從仲淹之鄧得疾昏廢卧許昌富弼守淮西過省之猶感慨道忠義問弼之來公邪私邪弼曰公純佑曰公則可凡病十九年卒年四十子正臣守太常寺太祝

宋史

范純仁字堯夫仲淹次子資警悟八歲能講所授書以父任太常寺太祝皇祐元年進士第調知武進縣以遠親不赴易長

葛亦不往與父門下賢士胡瑗孫復石介李覲之徒游晝夜肄業置燈帳中帳頂如墨色仲淹沒始出仕以著作佐郎知襄城縣襄城民不蠶織勸使植桑民呼爲著作林僉書許州觀察判官知襄邑縣縣有牧地衛士牧馬以踐民稼純仁捕一人杖之牧地初不隸縣主者怒白其事於上劾治甚急純仁言養兵出於稅畝若暴民田而不問稅安所出詔釋之且聽牧地隸縣治平中爲侍御史時議濮王典禮純仁言陛下受命仁宗而爲之子與前代定策入繼之主異宜如王珪等議繼與呂晦等更論奏不聽純仁還所授告敕家居待罪旣而皇太后手書尊王爲皇夫人爲后純仁復言陛下以長君

臨御奈何使命出房闈異日或爲權臣矯託之地乃詔罷追尊起純仁就職純仁請出不已遂通判安州改知蘄州歷京西陝西轉運副使召還拜兵部員外郎兼起居舍人同知諫院奏言王安石變祖宗法掎克財利民心不寧書曰怨豈在明不見是圖願陛下圖不見之怨神宗曰何謂不見之怨對曰杜牧所謂天下之人不敢言而敢怒是也神宗嘉納之曰宜爲朕條古今治亂可爲監戒者乃作尚書戒以進加直集賢院同修起居注薛向任發運使行均輸法於六路純仁言安石以富強之術啓廸上心使小人掎克生靈斂怨基禍劉琦錢顛等一言便黜廷臣方大半趨附陛下又從而驅之其

蘇州府志 卷五十一
將何所不至宜速還言者而退安石荅中外之望不聽遂求
罷諫職改判國子監去意愈確其所上章疏語多激切神宗
悉不付外純仁盡錄申中書安石大怒乞加重貶神宗曰彼
無罪姑與一善地命知河中府徙成都路轉運使以新法不
便戒州縣未得遽行安石怒純仁沮格竟坐失察僚佐燕游
左遷知和州徙邢州未至加直龍圖閣知慶州過闕入對神
宗曰卿父在慶著威名今可謂世職卿隨父既久兵法必精
邊事必孰純仁揣神宗有功名心卽對曰臣儒家未嘗學兵
先臣守邊時臣尚幼不復記憶且今日事勢宜有不同陛下
使臣繕治城壘愛養百姓不敢辭若開拓侵攘願別謀帥臣

遂行秦中方饑擅發常平粟振貸或謗其所全活不實詔遣
使按視會秋大稔民爭輸還之使者至已無所負環州种古
執熟羌爲盜流南方過慶呼寃純仁以屬吏非盜也古避罪
譟訟詔御史治于寧州純仁就逮民數萬遮馬涕泗不得行
至有自投於河者獄成古以誣告謫亦加純仁以他過黜知
信陽軍移齊州丐罷提舉西京留司御史臺復知河中諸路
閔保甲妨農論救甚力哲宗立復直龍圖閣知慶州召爲右
諫議大夫以親嫌辭改天章閣待制兼侍講除給事中時宣
仁后垂簾司馬光爲政將盡改熙寧元豐法度純仁謂光去
其太甚者可也差役一事尤當熟講而緩行光持之益堅純

仁曰是使人不得言爾若欲媾公以爲容悅何如少年合安石以速富貴哉元祐初進吏部尚書同知樞密院事初純仁與議西夏請罷兵棄地使歸所掠漢人執政持之未決至是乃申前議又請歸一漢人子十縑事皆施行邊俘鬼章以獻純仁請誅之塞上以謝邊人不聽議者欲致其子收河南故地後鬼章子卒不至三年拜尚書右僕射兼中書侍郎純仁在位務以博大開上意忠篤革士風章惇得罪去朝廷以其父老欲畀便郡旣而中止純仁請置往咎而念其私情鄧綰帥淮東言者斥之不已純仁言臣嘗爲綰誣奏坐黜今日所陳爲綰已左降不宜錄人之過太深宣仁后嘉納學士蘇軾

以發策問爲言者所攻韓維罷門下侍郎補外純仁奏軾無罪維盡心國家不可因譖黜官及王覲言事忤旨純仁慮朋黨將熾與文彥博呂公著辯於簾前未解純仁因極言前世朋黨之禍并錄歐陽修朋黨論以進知漢陽軍吳處厚傳致蔡確安州車蓋亭詩以爲謗宣仁后諫官欲致於與憲執政右其說惟純仁與左丞王存以爲不可爭之未定及確新州命下純仁於宣仁后簾前言不可以語言文字之間曖昧不明之過誅竄大臣又上疏諫司諫吳安詩正言劉安世交章擊純仁黨確純仁亦力求罷明年以觀文殿學士知潁昌府踰年加大學士知太原府其境土狹民衆惜地不葬純仁遣

僚屬收無主燼骨別男女葬者三千餘又推之一路葬以萬計徙河南府再徙潁昌召還復拜右僕射宣仁后崩哲宗親政純仁乞避位哲宗語呂大防留之時用二三大臣皆從中出侍從諫官多不由進擬純仁言陛下初親政四方拭目以觀天下治亂實本於此不可不慎又羣小力排宣仁后垂簾時事純仁奏曰太皇太后保佑聖躬功烈誠心幽明共鑒議者不惜國事一何薄哉遂以仁宗禁言明肅垂簾事詔書上之曰望陛下稽倣而行以戒薄俗蘇轍論殿試策問引漢昭變武帝法度事哲宗震怒曰安得以漢武比先帝轍下殿待罪衆不敢仰視純仁從容言轍所論事與時也非人也哲宗

爲少霽轍平日與純仁多異至是乃服謝純仁曰公佛地位中人也哲宗旣召章惇爲相純仁堅請去遂以觀文殿學士加右正議大夫知潁昌府徙河南府又徙陳州初哲宗嘗言貶責之人殆似永廢純仁賀曰陛下念及此堯舜用心也旣而呂大防等竄嶺表會明堂肆赦章惇先期言此數十人當終身勿徙純仁聞而憂憤上疏申理忤惇意詆爲同罪落職知隨州明年又貶武安軍節度副使永州安置時疾失明聞命怡然就道居三年徽宗卽位欽聖顯肅后同聽政卽日授純仁光祿卿分司南京鄧州居住遣中使至永賜茶藥道除右正議大夫提舉崇福宮不數月以觀文殿大學士中太一

蘇州府志 卷五十一
宮使召之純仁以疾捧詔而泣曰上果用我矣死有餘責又遣中使賜茶藥促入覲仍宣渴見之意純仁乞歸許養疾徽宗不得已許之每見輔臣問安否乃曰范純仁得一識面足矣遂遣上醫視疾疾革以宣仁后誣謗未明爲恨呼諸子口占遺表命門生李之儀次第之所言凡八事建中靖國改元之旦受家人賀明日熟寐而卒年七十五詔賻白金三千兩敕官給葬贈開府儀同三司謚曰忠宣御書碑額曰世濟忠直之碑純仁性夷易寬簡不以聲色加人誼之所在則挺然不少屈自布衣至宰相廉儉如一所得奉賜皆以廣義莊前後任子恩多先疎族歿之日幼子五孫猶未官嘗曰吾平生

所學得之忠恕二字一生用不盡每戒子弟曰人雖至愚責人則明雖有聰明恕己則昏苟能以責人之心責己恕己之心恕人不患不至聖賢地位也有文集五十卷行世宋史
范純禮字彝叟仲淹第三子以父蔭爲秘書省正字遷三司鹽鐵判官以比部員外郎出知遂州瀘南有邊事調度苛棘純禮一以靜待之辦其可具者不取於民民圖像於廬奉之如神名曰范公菴除戶部郎中京西轉運副使元祐初入爲吏部郎中遷左司又遷太常少卿江淮荆浙發運使以光祿卿召遷刑部侍郎進給事中純禮凡所封駁正名分紀綱皆國體之大者張耒除起居舍人病未能朝而令先供職純禮批

蘇州府志 卷五十一 九
敕曰臣僚未有以疾謁告不赴朝參先視事者未能供職豈不能見君壞亂禮法所不當爲聞者悚動御史中丞擊執政將遂代其位先以諷純禮純禮曰論人而奪之位寧不避嫌邪命果下吾必還之宰相卽徙純禮刑部侍郎而後出命轉吏部收天章閣待制樞密都承旨出知亳州提舉明道宮徽宗立以龍圖閣直學士知開封府前尹以深刻爲治純禮一切以寬處之拜禮部尚書擢尚書右丞侍御史陳次升乞除罷言官竝自內批不由三省進擬右相曾布力爭不能得乞降黜次升純禮徐進曰次升何罪不過防柄臣各引所親且去不附己者爾徽宗曰然乃寢布議因從容諫曰邇者朝廷

命令莫不是元豐而非元祐以臣觀之神宗立法之意固善吏推行之或有失當以致病民宣仁聽斷一時小有潤色蓋大臣識見異同非必盡挾邪爲私也今議論之臣有不得志故挾此藉口其心豈恤國事直欲快私忿以售其姦不可不察也純禮沈毅剛正曾布憚之激駙馬都尉王誥曰上欲除君承旨范右丞不可誥怒會誥館遼使純禮主宴誥誣其輒斥御名罷爲端明殿學士知穎昌府提舉崇福宮崇寧中啓黨禁貶試少府監分司南京又貶靖江軍節度副使徐州安置徙單州五年復左朝議大夫提舉鴻慶宮卒年六十七宋史紹興初贈資政殿學士諡恭獻

蘇州府志 卷五十一
范純粹字德孺仲淹第四子以蔭遷至贊善大夫檢正中書刑
房與同列有爭出知滕縣遷提舉成都諸路茶場元豐中爲
陝西轉運判官時五路出師伐西夏高遵裕怒劉昌祚後期
欲按誅之昌祚憂恚病卧麾下皆憤純粹恐兩軍不協生他
變勸遵裕往問疾其難遂解神宗責諸將無功謀欲再舉純
粹奏關陝事力單竭公私大困若復加騷動根本可憂異時
言者必職臣是咎臣寧受盡言之罪不可緘默以貽後悔神
宗納之進爲副使人爲右司郎中哲宗立京東轉運使吳居
厚敗命純粹以直龍圖閣往代之盡革其苛政時蘇軾自登
州召還純粹與同建募役之議軾謂純粹講此事尤爲精詳

復代兄純仁知慶州時與夏議分疆界純粹請棄所取夏地
所言皆略施行又言諸路策應舊制也自徐禧罷策應若夏
兵大舉一路攻圍力有不勝而鄰路拱手坐觀其不拔者幸
爾今宜修明戰守救援之法朝廷是之夏侵涇原純粹遣將
曲珍救之珍日馳三百里破之於曲律擣橫山夏衆遁去元
祐中除寶文閣待制再任召爲戶部侍郎又出知延州紹聖
初哲宗親政用事者欲開邊釁御史郭知章遂論純粹元祐
棄地事降直龍圖閣明年復以寶文閣待制知熙州改知鄧
州歷河南府滑州旋以元祐黨人奪職知均州徽宗立起知
信州復故職知太原加龍圖閣直學士再臨延州改知永興

軍尋以言者落職知金州提舉鴻慶宮又謫常州別駕鄂州安置錮子弟不得擅入都會赦復領祠久之以右文殿修撰提舉太清宫黨禁解復徽猷閣待制致仕卒年七十餘純粹沈毅有幹略才應時須論事剴切以上宋史為帥端重有體閒謀明功罪當恩威兼用邊人畏服焉東都事畧

范純誠字子明夢齡四世孫夢齡仲淹之曾祖見名宦祖光謨餘杭令父埴

朝邑簿慶歷三年以叔父仲淹恩澤補太廟齋郎皇祐初仲淹置義田皆純誠所辦因奏為長洲尉俾創規法以貽永久

歷衢州司理嘉祐初遷監衡州菱源銀場卒盧志

李育字仲蒙吳縣人舉進士第四能為詩字畫亦清麗性高簡

故官不甚顯亦少知之者盧志

孫侔字少述少孤力學性至孝嘉祐中郡守唐詢表其門詔賜

粟帛姑蘇志

朱長文字伯原其先刻人世仕吳越祖億宋太宗朝內殿崇班閣門祇候知邕州累贈刑部尚書由開封來蘇州父公綽光祿卿知舒州長文方在娠所生周夫人夢覆錦衾或曰是生子能文矣十歲能屬辭讀書輒竟夕從泰山孫復授經於太學書無所不知尤邃於春秋博聞強識篤學力行年十九擢嘉祐四年乙科進士第吏部限年未即用時公綽守彭長文不俟燕歸州人榮之既冠授秘書省校書郎守許州司戶參

軍以墜馬傷足不甯從吏趨郊禋公綽欲以任子恩勾長文
幕官長文推與其季從弟丁父憂家居凡二十年築室郡治
西偏故吳越錢氏金谷園知州章帖表曰樂圃鄉人遂稱爲
樂圃先生郡將監司莫不造請謀政所急士大夫過者必往
見之以後爲恥名動京師元祐中起本州教授州有兩教授
以長文故也長文早歲作東都賦論者謂不減班張太冲其
教人先經術而後詞章授學者春秋洪範中庸無慮數百先
是范仲淹始建州學歲久墮廢其子純仁以侍郎制置江淮
漕事復請修構長文有力焉吳中水災長文陳五浦之利不
果行又作救荒議四篇上知州黃履行之民賴以安歷五考

名爲太學博士著釋問以見意紹聖間改宣教郎除秘書省
正字兼樞密院編修文字元符初卒年六十哲宗嘉其清賻
絹百疋博士米芾爲表其墓長文資稟忠樸雖在布衣慨然
有用世志暨出仕以田疇委諸弟惟藏書二萬卷所撰春秋
通志二十卷又有書贊詩說易解禮記中庸解琴臺志琴史
六卷蘇州續圖經五卷又撰次古今文詞爲吳門總集二十
卷樂圃文集一百卷書倣顏魯公所集周穆王以來金石遺
文名人筆跡作墨池閱古二編藏于家
盧志 附錄溫公詩
話吳人丁偃與朱長
文同年進士初試邇英延講藝詩云白虎前芳掩金華舊事
輕天心非不寤垂意在蒼生論者謂有古詩諷諫之體是歲
奏名甚高而御前下第
自是二十年方中選

郭附字明仲嘉祐八年進士知新建縣俗健訟好持吏短長附至問民疾苦皆以鷲獸暴橫爲言乃檄旁縣尉併力仍以厚賞啖壯士不閱月得獸數十尸諸庭乃號於衆曰有悍不率教如此獸者皆殺之無一人敢犯令者熙寧中以大理寺丞權知崑山縣官至朝奉大夫致仕幅巾策杖窮山林詩酒之適十八年東南高士皆樂與之游卒年八十四

盧志

徐師閔字聖徒其先建安人父奭歷通判蘇州兩浙轉運副使子孫遂爲蘇人師閔治平初爲虞部員外郎知江陰軍熙寧十年以司農少卿知袁州時江西有劇賊詹遇所過屠劫列城爲之騷動袁獨預修武事具戰船號令嚴肅常若寇至遇

引避不敢犯境又有瑞粟嘉禾之異爲治鎮靜有惠愛吏民生爲立祠轉運蔣之奇薦於朝部使者第課優等知洪州王韶皆列奏留再任尤爲蔣堂蔡襄所知自輔臣以下薦之者幾百人官至正議大夫東海郡侯告老以中散大夫普寧郡侯致仕時年六十七歸里與元絳程師孟輩以詩酒爲樂號十老年八十卒子鑄字元鈞年少入官有能名吏不敢欺及爲縣所至屏姦惡辨疑獄勸本業修學校課常居最政和初提舉兩浙常平修松江隄易土以石闢常熟水田數百頃爲之疆畝越四年以直秘閣除轉運副使遷發運副使以徽猷閣待制知杭州又歷廣揚二州終正奉大夫

盧志

蘇州府志 卷五十一
陳睦字子離祖絳莆田人舉賢良方正官至右司諫徙家蘇州
兄侗進士知汝州富弼辟為從事召除館閣校勘歷衛尉少
卿元豐中知陝湖宣三州睦嘉祐六年進士治平中詔舉館
閣才學之士睦與劉攽李清臣輩首被選擢拜監察御史熙
寧中提舉兩浙常平以曾公亮薦遷提點刑獄坐事免官元
豐閒高麗數遣使航海修貢朝廷以其恭順選使諭旨初命
林希希辭更以命睦睦即日就道上喜語輔臣曰林希無親
堅辭不往睦親在乃不憚行假起居舍人直昭文館特贈仙
華金帶使還言故事惟寶文閣直學士以上乃服金帶今請
上所賜特旨令服之仍真拜所假官職又賜金璫以示寵尊

直龍圖閣知潭州改寶文閣待制知廣州子彥文字經仲建

炎二年以龍圖閣待制知江州視事方十日會盜張遇犯城

彥文極力固守遇乃引去明年為沿江措置使尋躋法從彥

文弟彥武字緯叔為提舉官

盧志

張僅字幾道治平中舉進士與里人顧棠皆為王安石門下士

安石作三經義二人與焉僅官至著作佐郎卒棠字叔思撰

周易義類三卷

盧志

閻邱孝終字公顯東坡謫黃州時孝終為守與之往來甚密未
幾掛冠歸與諸名人為九老會東坡過蘇必見之嘗云蘇州
有二邱不到虎邱即到閻邱

中吳紀閻

鄭景平字希尹居帶城橋

盧志初名安平熙寧三年與父仲同登進士第

剛正不撓所

泣官有廉介稱嘗為大理丞每有疑獄中夜拜禱斷得其情

既請老家居詔復起知饒州數月復拂衣歸或問故荅曰天

子命景平為郡當以撫字為職乃不得行其志今日須金若

干明日須粟若干民已枯骨矣捶考不出吾安得不歸時朱

勔用事從之者甚眾獨景平終始不阿子綱字天和亦能文

屢為郡

吳郡志

章棗字質夫浦城人祖頻為侍御史忤章獻后旨黜官仁宗欲

用之而卒父訪禮賓副使既徙蘇號曰北章

父訪以下十三字從盧志增

棗以叔得象蔭為孟州司戶參軍應舉入京聞父對獄于魏

棄不就試馳往直其寃還試禮部第一擢知陳留縣歷提舉

陝西常平京東轉運判官提點湖北刑獄成都路轉運使入

為考功吏部右司員外郎元祐初以直龍圖閣知慶州時朝

廷戢兵戒邊吏勿妄動且捐葭蘆安疆等四砦予夏使歸永

樂之人棗言夏嗜利畏威不有懲艾邊不得休息宜稍取其

疆土如古削地之制以固吾圉然後諸路出兵擇據要害不

過一再舉勢將自蹙矣遂乘便出討以致其師夏果入圍環

州棗先用閒知之遣驍將折可適伏兵洪德城夏師過伏兵

識其母梁氏旗幟鼓譟而出斬獲甚眾又預毒牛圈瀦水夏

人馬飲者多死除知同州紹聖初知應天府加集賢殿修撰

知廣州徙江淮發運使哲宗訪以邊事對合旨命知渭州至
 卽上言城胡蘆河川據形勝以逼夏乃以三月帥熙河秦鳳
 環慶四路之師出胡蘆川河築二城於石門峽江口好水河
 之陰二旬有二日成賜名平夏城靈平砦方興役時夏以其
 衆來乘棗迎擊敗之旣而環慶鄜延河東熙河皆相繼築城
 進拓其境夏人睥視不敢動夏主遂奉其母合將數十萬兵
 圍平夏疾攻十餘日建高車臨城填塹而進不能克一夕遁
 去夏統軍嵬名阿埋西壽監軍妹勒都邁皆勇悍善戰棗謀
 其弛備遣折可適郭成輕騎夜襲入其帳執之盡俘其家虜
 馘三千餘牛羊十萬夏主震駭哲宗爲御紫宸殿受賀累擢

棗爲龍圖閣端明殿學士棗在涇原四年凡創州一城砦九
 夏自平夏之後不復能軍屢請命乞和哲宗亦爲寢兵棗立
 邊功爲西方最徽宗立徙知河南拜同知樞密院事踰年力
 謝事授資政殿學士中太一宮使未幾卒贈右銀青光祿大
 夫諡莊簡盧志贈太師秦國公諡莊敏棗七子緯綜綜緝緝緝緯綜最
 知名以上宋史本傳緯字伯成由推官爲戶部員外郎提點淮南東
 路刑獄權知揚州兼提舉香鹽事時方鑄崇寧大錢令下市
 區晝閉人持錢買物至日盱皇皇無有售緯飭市易務致百
 貨以小錢收之且檄倉吏糶米以大錢予之盡十日止民心
 遂安未幾新鈔法行舊鈔盡廢一時商賈束手或自殺緯得

訴者所持舊鈔為錢以千計者三十萬上疏言錢法誤民請
 如約以示大信蔡京怒罷絳降兩官以緹故竄台州復通判
 秀州初粲教子極嚴閉置一室中故絳與綜皆有文名晚年
 詩益高清真雅健得唐人風有文集三十卷終戶部郎中綜
 字子京有大志元祐二年進士第一調洛陽簿時范純祐為
 尹按哲宗時范純仁純粹皆嘗知河南府純祐官止將作監簿此恐誤一見待以國士與韓玉
 汝李邦直等俱以文行薦於朝就除京兆府教授政和末起
 知解州移均州房州婦人越所部訴其子於均綜謝曰房非
 吾治也又訴於轉運使使以屬綜名詣庭下不以屬吏鑄論
 開曉母子感悔再拜而去歷陝西轉運判官入為戶部員外

郎中書侍郎劉達妻綜之姊也達漸復元祐之政綜多贊之
 蔡京欲擠達且忌綜不附已使其黨攻之出綜湖州論者不
 已差主管西京崇福宮坐緹獄竄溫州入為秘書省校書郎
 遷倉部員外郎宣和三年除提舉兩浙常平未上改提點刑
 獄時秀州嘉興富人高安與陳氏有故怨聞方臘起誣以為
 盜聚羣惡操兵入其室盡殪之以捕盜徼賞及長洲陸氏怙
 富橫閭里殺人應捕輒賂吏執平人代已綜一閱盡得其情
 取二人寘諸法衆懼以為神明四年以直秘閣知越州兼浙
 東安撫越新去方臘之亂人情危懼日三四驚旁郡守將往
 往益兵自衛綜至延問吏民宴集僚佐如平時有勇敢卒謀

蘇州府志 卷五十一 人物四
爲變綜飭將吏指取無一人脫者闔郡大震譚稹宣撫燕山
請綜爲參謀轉朝請大夫右文殿修撰遂疏燕雲決不可守
之狀反復數千言金人破蔚州背歸山後議稹以錯置乖方
罷綜落職送吏部及童貫出師而燕山七郡與朔武皆不守
如綜言會赦恩上書告老復龍圖閣直學士致仕卒綜歷通
判常州縮知丹徒縣緹字君遠簽判西安州縝字彥升簽判
蘇州棗孫芟承奉郎蓋監蘇州稅俱列仕顯及蔡京復相遂
興制獄傾章氏緹居蘇州或得私鑄錢數巨罌京風言者誣
緹與州人郁寶所鑄詔遣李孝壽張茂直沈畸蕭服更往鞫
之連繫數百人累月卒無實獄多死者京大怒別遣孫傑鞫

之傳致如律緹刺面配沙門島追毀出身以來文字除名勒

停籍入其家竄緹台州綜秀州綜溫州縮睦州縝永州芟處

州蓋均州官司降罷除名者十餘人時論寬之孫傑擢龍圖

閣直學士知蘇州張商英爲相辨前獄移緹常州綜復朝奉

郎通判秀州頃之緹改授內殿崇班綜秘書郎

以上參用盧志按孫觀

章綜墓誌中吳紀聞皆云章氏本建安郇公之後裔後徙於平江者有二族子厚丞相家州南質夫樞密家州北兩地屹然輪奐相望爲一州之甲吳人號南北章以別之則章氏之徙吳鑿鑿可據乃東都事略及宋史但言浦城人蓋舊史之疎脫多矣

章甫字端叔自建州徙居於蘇八世祖及唐康州刺史及孫仔
鈞仔釗俱仕閩王審知仔鈞之後居西邨世有顯人仔釗之

後居珠林至甫曾祖可法始登第官至秘書丞甫熙寧三年
進士初調臨川尉有盜劫殺行商獄詞連逮者以十數甫辨
三人抵罪餘悉縱之知壽春縣大臣以甫孟子解義進詔付
秘書省除應天府國子監教授改知山陰縣訟牒繁劇豪民
竄易戶名以避征役甫得其情流配數人老奸屏息邑以大
治又濬海塘以溉民田哲宗卽位除通判宿州南京押綱侍
禁史士宗侵耗官米反訟倉官獄久不決朝廷委甫治之士
宗竟坐流竄以父憂去久之入爲太府寺丞召對稱旨除府
界提舉常平增峻雙泊河隄河朔飢民之在境者因廩給之
徽宗朝知虔州還奏淮甸歲凶宜加振卹大臣初雖諱言卒

如其請崇寧初除都官郎中陞對抗言元祐臣僚削秩投荒
皆緣國事非爲身謀稍稍內徙道路交慶今復刻名黨籍禁
錮子孫恐非陛下本意上雖優容卒與時論不合致仕歸吳
起知泰州尋請祠以歸甫寡嗜慾惟藏書萬卷校讐精密子
八人憲最知名憲字叔度居黃邨樂道好德操履高潔與弟
恚俱受學王蘋游於楊時朱震呂本中諸公閒憲尤邃於春
秋宣和中責監漢陽軍酒稅歿於兵有復軒集十卷曾幾爲

序盧志

盧秉字仲甫父革德清人以光祿卿退居於吳秉未冠有雋譽
嘗謁蔣堂坐池亭堂曰亭沼粗適恨林木未就耳秉曰亭沼

如爵位時來或有之林木非培植根株弗大成似士大夫立名節也堂賞味其言曰吾子必為佳器中進士甲科調吉州推官青州掌書記知開封府倉曹參軍浮湛州縣二十年人無知者王安石得其壁閒詩識其靜退方置條例司預選中奉使淮浙治鹽法與薛向究索利病出本錢鬻鹽濱海之民戒不得私鬻還奏遂為定制檢正吏房公事提點兩浙淮東刑獄專提舉鹽事持法苛嚴罪及妻孥一歲中犯者以千萬數進制置發運副使東南饑詔損上供米價以糶秉言價雖賤貧者終艱得錢請但償糶本而以其餘振贍是歲上計神宗問曰聞滁和民捕蝗充食有諸對曰有之民飢甚死者糶

枕藉帝惻然曰前此特趙抃為朕言之爾先是發運使多獻餘羨秉言職在董督六路財賦以時上之安得羨請自是罷獻獨以七十萬緡償三司逋加集賢殿修撰知渭州五路大出西討惟涇原有功進寶文閣待制夏境胡盧州距塞二百里恃險遠不設備秉遣將姚麟彭孫襲擊之俘斬萬計遷龍圖閣直學士夏酋仁多鬼丁舉國入寇犯熙河定西城秉治兵瓦亭分兩將駐靜邊砦指夏人來路曰吾遲明坐待捷報矣及明果至見宋師驚曰天降也縱擊之皆奔潰鬼丁死詔褒賜服馬金幣秉守邊久表父革年老乞歸移知湖州行二驛復詔還渭革疾亟乃得歸元祐中知荆南劉安世論其行

鹽法虐民降待制提舉洞霄宮卒

宋史

孫冲字子和熙寧六年進士少負才名受知王安石嘗著鄉黨傳說二論安石大奇之知含山縣號為循吏律已甚嚴一毫不妄取秩滿率家人解其歸裝老獲有蓄一砧者冲視之曰非吾來時物也命還之薦章交上改宣德郎未幾卒年三十五以從子峻為後

盧志

李撰字子約唐曹恭王明後祖餘慶國子博士知常州卒官葬橫山遂為吳人撰熙寧六年進士歷彭澤令時括民田轉運使務苛擾欲多得匿戶羨田為功撰持不可抱牘抗論且請就劾并解印綬去使者度不可屈從之時王安禮為部刺史

使者還金陵言撰所以期共構撰罪安禮曰縣令敢與部使者爭衡必介特有守士也亟呼吏就使者草奏薦之元祐三年議遣使修復小吳河撰上復河賦二篇言河不可復通判莫保二州官至朝奉大夫大觀三年卒年六十七撰廣孟子說著養氣論三篇有毛詩訓解二十卷孟子講義十四卷文集五十卷史贊論五卷子彌遜

盧志

黃彥字修中其先浦城人父挺字公操章得象薦為吳縣尉歷秀州司理餘杭尉筠州判官守太子洗馬致仕與章帖等為十老會累贈金紫光祿大夫彥熙寧中以王安石經說與弟頡俱第進士安石舉為越州教授遷瀛州防禦推官知崇德

縣長興丞以省罷知浦江縣清直明恕民畫像祠之紹聖中
知虹縣有廟吏譌言井蛇爲龍水能愈疾彥以蛇磔死妖乃
不興又麥秀兩岐蝗不入境時稱有古循吏風除楚州教授
宗正寺簿改富陽令爲政如前時坐法免管勾嵩山崇福宮
官至朝奉大夫致仕政和四年卒頡字升中官至朝議大夫

盧志

顧襄字公甫太學上舍生名聲籍甚登熙寧九年第調丹徒尉
召爲太學正元豐五年卒於京師又顏長民登元豐二年進
士第三子采摛字亦相繼擢高科采字君用終提舉常平摛
字仲謙終嚴陵守孚字端中崇觀閒有聲太學士行甚美每

試必居前列皆目之爲顏夫子人欲識其面不可得既登第

卽下世

中吳紀聞

秦希甫字辨之元豐進士元符中爲陝西轉運判官初熙河將
王贍下邈川待制胡宗回爲帥復遣贍取青唐詔立鄯州而
以邈川爲湟州未幾屬羌叛宗回討之數敗希甫奏王贍厚
取邈川青唐府庫物因此致變又言自河至湟道路險阨往
者如赴死所湟州本溫溪心故地當求溫氏之後立爲屏輔
皆在可棄事下宗回宗回持不可希甫罷去徽宗尋棄鄯州
任伯雨再疏宗回罪奪職知蘄州崇寧初黨論起言者又以
希甫棄地爲罪降官入黨籍云

盧志

李璋居盤門爲人不羈王荆公甚愛其才嘗有詩送行云湖海聲名二十年尚隨鄉試已華顛又送其下第云學如吾子何

憂失命屬天工不可猜後改名玖以特恩補官孫益字彥中

亦登科紹興閒任監察御史居常熟

中吳紀聞吳郡志合纂

姚淳吳縣人家世業儒淳性孝謹其先墓嘗有甘露芝草麥雙

穗之異蘇子瞻范景仁爲賦三瑞堂詩時稱姚孝子

盧志

邊裕字道夫其先楚邱人父珣英宗時平江軍節度推官官至

太子中舍始家於吳裕爲泰州司錄時年尚少知州張次山

果於爲政興舉廢事投竄奸吏有稱於時多裕畀助之力尋

以江寧府司錄監湖州酒歲荒餓孳橫道知州張詢委以賑

卹全活甚衆後二十年其子知章過湖故老相指曰此吾邊

司錄子也歷睦州團練推官改潤州觀察推官辟江都縣遷

開封新城左廂公事銳於決遣庭無留人廂素號難理專以

婦女爲訟至是相戒無犯郊恩賜五品服監大觀東庫除管

勾南京留司御史臺公事卒年六十四裕通習時政歷仕四

十年所至莫不畏愛及卒皆悼惜之

盧志

黃策字子虛彥子九歲能屬文弱冠擢進士第嘗追和梁昭明

所選詩持見蘇軾軾曰子異時必以文顯歷雍邱主簿齊州

教授元符末詔中外言事時昭慈聖獻皇后旣復位號而典

冊有未盡正者策引古誼上書甚切蔡京深銜之崇寧初黨

籍羈管登州會赦還鄉建炎中追錄黨人除直秘閣通判嚴州初欽宗在青宮時聞策名大書隨緣二字以賜因自號隨緣居士子維

盧志云自有傳而他處不見

維弟纓字端冕宣和末屢上書

言事李綱爲行營使嘗居幕府遭亂還鄉陳長文稱爲干人之英紹興初以文名策有隨緣居士集四十卷纓有感事詩纓子季魯有集十卷皆附焉季魯字道夫策弟簡字能甫黃氏自挺以下居吳縣聚塢山爲縣中大族

盧志

范正平字子夷純仁子學行甚高雖庸言必援孝經論語父卒詔特增遺澤官其子孫正平推與幼弟紹聖中爲開封尉有向氏於其壙造慈雲寺戶部尚書蔡京以向氏后戚規欲自

結奏拓四鄰田廬民有訴者正平按視以爲所拓皆民業不可奪京坐罰銅用是蓄恨正平及當國乃言正平矯撰父遺表又謂李之儀所述純仁行狀妄載中使蔡克明傳二聖虛佇之意遂逮正平之儀克明同詣御史府正平將行其弟正思曰議行狀時兄方營窀穸之事參預筆削者正思也兄何爲哉正平曰時相意屬吾且吾居長吾不往兄弟將俱不免不若身任之遂就獄捶楚甚苦皆欲誣伏獨克明曰舊制凡傳聖語受本於御前請寶印出注籍於內東門使從其家得永州傳宣聖語本有御寶又驗內東門籍皆同其遺表八事諸子以朝廷大事防後患不敢上之繳申穎昌府印寄軍資

庫自穎昌取至亦實獄遂解正平羈管象州家屬死者十餘人會赦得歸穎昌唐君益為守表其所居為忠直坊正平不可竟撤去之正平退閒久益工詩尤長五言著荀里退居編以壽終

宋史

潘兌字說之吳人崇寧二年進士累官中書舍人左諫議大夫刑吏禮三部侍郎歷顯謨閣待制知洪州終徽猷閣待制同郡朱勔以倖進寵眷無比兌不登其門勔護父沖喪歸鄉人傾城出迎兌獨不往其先塋適近沖新阡勔欲得之修敬於兌兌杜門不納勔至京訴於上降御筆奪之尋誣以罪由是落職路允迪稱其言語文章一本六經之醇毅然有守終無

玷缺與從子民瞻有倡和詩集

盧志

范周字無外文正公姪孫贊善大夫純古之子負才不羈工詩詞無意榮達安貧自樂未嘗屈折於人所居號范家園所賦詩甚多時出傑句如咏懷云一瓢有道泰山重五鼎不義鴻

毛輕其氣槩嶂兀類如此

吳郡志

邊知章字公望裕子崇寧五年進士國子監書庫官京畿京西路提舉鹽香司管幹公事歷永靜軍通判律學博士通判開德府以年勞賞典遷官累朝請即靖康初金人犯闕尋以和議退澶淵當孔道明年春告滿代者避禍愆期金人將復動或勸知章逃去知章抵書平江諸弟以謂去歲兵至宜敵不

敵今歲既盟宜和不和速禍必矣苟求幸逃豈不愧守邢匿
詔事乎藉使非力所能而死當見吾祖地下無靦顏其冬金
人至城下軍潰於內遂死之年四十七贈朝散大夫官其一
子尋復命其幼者子維嶽知袁州維熊通判紹興府初知章
高祖肅真宗朝爲兵部郎中知邢州澶淵之役密詔便宜退
保肅匿詔抗敵併納傍郡鎮魏六州老弱全活者數十萬故
知章以自勵云

盧志

朱良字良伯吳郡人祖公綽光祿卿父季端爲郎屢典名郡良
仕海鹽尉建炎四年金人犯順車駕南幸分兵入縣境良謂
僚友曰今日乃忠臣義士死國之時也被甲持戈集射士百

餘奮而前金兵數人死衆爲披靡然力不敵竟死同郡時有
武舉進士保義郎褚孜爲永康尉賊馬犯州與兩浙兵馬鈐
轄閻章婺州諸縣弓手將領馬珍俱被害事聞官良之子思
孜等亦各贈三官恩澤兩資思後以朝議大夫知漢陽軍贈

良銀青

盧志

郭元邁字英遠附之孫博通經史入太學魁上舍建炎二年應
募奉使時建安魏行可假禮部侍郎充河北金人軍前通問
使元邁以右武大夫和州團練使爲之副行次河朔以尺紙
付家云出疆當薙棘時難保全生此身已許國矣至金上書
其帥黏罕乞歸二聖金人留之不遣尚書洪皓北歸言其以

身殉國棄之不取緩急何以使人元邁不肖鬢髮換冠卒於

虞中

盧志 按宋史 附見魏行可傳

鄭凝之戢孫建炎中為浙西安撫司機宜建康潰卒戚方犯鎮

江知府胡唐老遇害凝之亦以兵死詔官其家一人

宋史

滕茂實字秀穎元發從子也

元發見流寓

初名裸重和元年上舍登

第徽宗改賜今名官至奉議郎靖康初金人入寇朝議割三

鎮以和茂實由水部員外郎假工部侍郎副簽書路允迪出

使河東割地太原陷允迪還至代州金人獨留茂實先是茂

實兄禰亦在虞中故黏罕聞茂實名將屈為用亦遷之代復

從京師取其弟華實以慰其意常使人諭茂實易戎服又驅

巾幘稍高者數人至前殺之屢加逼脇茂實弗動顧莫能生

還乃自為哀詞復篆宋工部侍郎滕茂實墓九字裏以奉使

黃旛密授其友朔寧府司理董誥屬以後事欽宗自出都城

舊臣無敢候問起居者洎過代州茂實具冠裳迎謁拜伏號

慟州民為之感泣金人謂之曰國破主遷所以留公蓋將大

用茂實請從舊臣俱行金人不許遂留鴈門董誥拔歸茂實

與之泣別自述其出處附表以聞茂實竟憂憤成疾卒金人

哀其忠為起墓臺山寺歲時祀之建炎二年誥以茂實哀詞

言於張浚浚以誥為陝西轉運判官上其死節宣付史館紹

興二年追贈龍圖閣直學士官其家三人後謚忠節紹定中

知平江府吳淵立祠於學宮祠歷蘇州糧料院勾當新城右
 廂公事大宗正丞通判代州官朝議郎金人犯順邊郡望風
 降避祠率衆城守不下力屈援絕爲虜所拘劉豫興解州鹽
 利以太府卿名執節不辱而死二子彪彪俱陷虜中祠弟倚
 以蔭補官歷知榮州廣安軍貴州茂實子修字敏叔以恩補
 官歷平江府司戶監常州比較務衢州司法知蕪湖縣官至

宣義郎

盧志

附錄茂實哀詞

茂實奉使無狀不復返父母之邦所當從其主以全臣節
 或怒而與之死幸以所杖旛裹其尸及以所篆九字刊之
 石埋之臺山寺下不必封樹蓋昔年病中嘗夢游清涼境
 界覺而病愈恐有前緣今預作哀詞幾於不達方之淵明
 則不可若蘇屬國牧羊海上而五言之作始敢援此例云

蓋鹽老書生謬列王都官索米了無補從事敢辭難殊鄰
 復盟好仗節來開關城守久不下川途望漫漫儉輩果不
 惜一往何當還牧羊困蘇武假道拘張騫流離念窘束坐
 閱四序遷同來悉言歸我獨留塞垣形影自相弔國破家
 亦殘呼天會不聞痛甚傷肺肝相逢老兄弟悼歎安得歡
 金人自南歸得志鞍馬間波瀾卷大厦一木乃求安世事
 寧有此聊發我所存爵祿非所慕金珠敢懷貪縱或違我
 心寧不汗我顏昔燕破齊土羣臣望風奔王蠋獨守節燕
 人有甘言縊首自絕脰感慨今昔閒未嘗食齊祿徒以世
 爲民況我祿數世一死何足論遠或死江海近或死朝昏
 斂我不須衣裹尸有黃旛題作宋臣墓篆字當深刊我妻
 尚少艾兒女皆童頑四海無置錐飄流倍悲酸誰當給衣
 食使不厄飢寒歲時一酌我聊以慰我魂我魂
 自悠悠異鄉寄沈寃他時風雨夜草木號空山

蘇州府志卷第五十

蘇州府志卷第五十一

人物五

吳縣

宋

徐林字稚山祖師回字望聖熙寧間駕部郎中嘗知南康軍蘇
 轍為作直節堂記父闕中為吏有能名歷鄂州司法吏部郎
 直秘閣林宣和三年進士少有特操從母之夫王黼用事恥
 與附麗寧坎堦卑官紹興初上書言事召對改官累遷太府
 少卿出為江西轉運副使劾秦檜親黨檜諷兩浙轉運誣林
 沮經界法貶興化軍十三年復入為刑戶二部侍郎論國用
 太廣宜撙節之隆興初為吏部侍郎復論符離之役非計遂

以敷文閣直學士奉祠知平江府力辭旋乞致仕再以給事中召不起遷龍圖閣學士卒年八十餘世稱賢侍從以林爲首少居吳縣硯石山下自號硯山居士

吳郡志盧志合纂

徐兢字明叔林弟幼穎異不羣年十八入太學以父任補通州司刑曹事辟入阮冶司幕攝事雍邱民服其化獄訟衰止移攝原武縣時有挾其弟貴勢者威震郡邑檄邑治市炭後至與慢令者兢疏其害聞諸朝願以身贖無辜鄭竦謂同列曰使縣令皆如徐兢天下其有不治乎宣和中以禮物官隨路允迪使高麗撰高麗圖經四十卷上之徽宗覽書大悅召對便殿賜出身擢大宗丞兼管書學以篆名家遷刑部員外郎

以時相冊免坐親嫌謫監池州永豐監起除沿江制司參議奉祠吳中二十年而卒

盧志

盧知原字行之秉子以父任知歙縣因近臣薦赴都堂審察累遷梓州路轉運副使時承平旣久戎備皆弛知原招補兵籍築城亘二十餘里王黼當國費出無藝知原因疏言之黼怒罷去久之起提點京東刑獄改江西轉運副使過闕入奏徽宗賜三品服先是綱運阻於重江吏卒並緣爲奸知原悉意經理故先諸道上京師進一官尋除直秘閣爲江淮荆浙等路發運使遷秘閣修撰提舉河北以言者劾褫職高宗卽位復龍圖閣知溫州時葉濃陷建州楊勅陷處州知原繕甲兵

增城濟陞帝東幸知原由海道轉粟及金縉十餘萬至台州
 召見稱獎擢右文殿修撰管內安撫使在郡四年民繪像祠
 之王師討范汝為召為添差兩浙轉運使罷提舉太平觀都
 督孟庾辟為參謀改徽猷閣待制知臨安府諫官唐輝言知
 原為政乖謬詔復為都督府參謀官章再上遂以舊職奉祠

紹興十一年卒

宋史 盧志唐輝字子明寓居崑山以文章名於時登政和進士第紹興中為諫官論罷

盧知原官至禮部侍郎弟燭子子壽並進士

盧法原字立之知原弟自知雍邱縣積官太府少卿賜同上舍
 出身使遼還遷司農卿賜三品服為吏部尚書以官秩次第
 履歷總為一書功過殿最開卷瞭然吏不能欺坐王黼累罷

為顯謨閣待制紹興元年提舉臨安洞霄宮張浚承制起知
 夔州尋為龍圖閣學士川陝等路宣撫處置副使進端明殿
 學士川陝宣撫副使金人攻關輔叛將史斌陷興州法原命
 諸將堅壁言戰者斬眾以為怯未幾河東經制使王燮以乏
 食班師法原開關納之與燮同破斌復興州方巨盜充斥秦
 隴叛兵欲窺蜀法原極意拊循嚴為備禦視山川險阻分地
 置將前後屢捷會兀朮攻關為吳玠所敗法原與玠素不睦
 玠因奏功訟法原不濟師不餽糧不銓錄立功將士帝手詔
 詰問法原自辯甚力上頗不直之五年春卒於軍

宋史

滕膺字子勤茂實從子紹聖進士授台州戶曹方臘作亂台州

震恐知府趙咨道通判李景淵駭愕遁去膺慨然任其責移書訣父母昆弟局妻子於署解諭台民以利害人人感泣聽命下令發夫守險增陴浚隍治器募兵運糧糗分屯列柵爲死守計日夜撫循士卒城中始有固志山民呂師囊起兵應賊導以攻城前後數匝膺應機設伏立摧破之城賴以全存活甚衆時咨道景淵雖遁而膺所上下公牒仍系其爵名圍解亟歸上狀膺不預又闔尹擅兵賊臣柄國咨道景淵獵顯官膺僅從捕盜七人之例改京秩未幾徙衢州司錄及金人犯順起爲提舉攝應天府少尹高宗以元帥駐河北勸進爲帳前準備差俄改淮寧通判拒劇盜孔彥舟王善數十萬衆

以守城功移知蔡州除直秘閣京西路計度轉運副使渡江爲張俊參軍李成所嫉劾免後復起至管台州崇道觀十五年卒諡忠惠台人德之立廟祀請於朝賜額義靈寧宗初贈

忠烈侯

牛若麟吳縣志本朱文公集

李彌遜字似之撰子弱冠以上舍登大觀三年第調單州司戶累官起居郎以封事剴切貶知廬山縣改奉嵩山祠廢斥八載宣和末知冀州金人犯河朔彌遜捐金帛致勇士修城堞決河護塹邀擊其游騎斬首甚衆兀朮北還戒師毋犯其城靖康元年召爲衛尉少卿出知瑞州二年建康府牙校周德叛執其帥宇文粹中殺官吏嬰城自守勢猖獗彌遜以江東

蘇州府志 卷五十一 四
運判領郡事單騎扣賊圍招降之誅首惡五十人撫其餘黨
一郡帖然改淮南轉運副使後奉興國宮祠知饒州召對奏
當堅定規模排斥姦言帝嘉其讜直輔臣不悅以直寶文閣
知吉州七年秋遷起居郎彌遜自政和末以上封事得貶垂
二十年及復居是職論事鯁切如初是冬試中書舍人奏六
事曰固藩維嚴禁衛練兵節用收民心擇守帥試戶部侍郎
秦檜再相惟彌遜與晏端復有憂色八年乞外詔不允趙鼎
罷相檜專國贊帝決策通和金遣烏陵思謀入界索禮甚悖
軍民皆不平胡銓上疏乞斬檜范如圭以書責檜黨讐辱國
曾開引古誼以折檜相繼貶逐彌遜請對言金使請和欲行

君臣之禮有大不可帝詔廷臣大議即日入奏彌遜手疏力
言陛下受金人空言未有一毫之得乃欲輕祖宗之付託屈
身委命自同下國而尊奉之倒持太阿授人以柄危國之道
而謂之和可乎借使金人姑從吾欲假以目前之安異時一
有無厭之求意外之欲從之則害吾社稷之計不從則釁端
復開是今日徒有屈身之辱而後患未已又言陛下率國人
以事讐將何以責天下忠臣義士之氣力陳不可者三檜嘗
邀彌遜至私第曰政府方虛員苟和好無異議當以兩地相
浼荅曰彌遜受國厚恩何敢見利忘義顧今日之事國人皆
不以爲然獨有一去可報相公檜默然次日彌遜再疏言愈

切直檜大怒彌遜引疾帝諭大臣留之時和議已決賴彌遜
廷爭不受封冊九年春再上疏乞歸田里以徽猷閣直學士
知端州改知漳州十年歸隱連江西山是歲兀朮分四道入
侵明年又侵淮西取壽春竟如彌遜言十二年檜乘金兵既
敗收諸路兵復通和好追仇向者盡言之臣嗾言者論彌遜
與趙鼎王庶曾開四人同沮和議於是彌遜落職十餘年間
不通時相書不請磨勘不乞任子不序封爵以終其身常憂
國無怨懟意二十三年卒朝廷思其忠節詔復敷文閣待制
有奏議三卷外制二卷議古三卷詩十卷

宋史

李彌大字似矩彌遜弟登崇寧五年進士第以大臣薦召對除
校書郎累遷起居郎試中書舍人同修國史童貫宣撫永興
走馬承受白鏐恃貫不報師期朝廷止從薄責彌大繳奏以
爲邊報不至非朝廷福鏐坐除名彌大亦出知光州移鄂州
召爲給事中拜禮部侍郎金人大舉入侵李綱定城守之策
命彌大爲參議與綱不合罷未幾除刑部尙書初朝廷許割
三鎮畀金人旣而遣种師道師中等援河北姚古援河東彌
大上疏乞起河東西境鄰府諸郡及陝西兵以濟古之師起
河東路及京東近郡兵以濟師道師中之師爲腹背攻劫之
圖遂除彌大河東宣撫副使張師正領勝捷軍敗於河東潰
歸彌大誅之復遣餘卒援真定餘卒叛宣撫罷命彌大知陝

州河東破小將李彥先來謁言軍事彌大壯之留為將戍崞
 澠間以遏敵會永興帥范致虛糾兵勤王檄彌大充諸道計
 議行至方城道阻乃率眾赴大元帥府建炎元年除知淮寧
 府尋召為吏部侍郎帝如杭州命權紹興府試戶部尚書兼
 侍讀呂頤浩視師以彌大等為參謀官彌大奏邊圉幸無他
 頤浩不宜輕動又言已為天子從官非宰相可辟陛下必欲
 留臣當別為一司伺察頤浩過失忤旨出知平江府沈與求
 劾彌大謀間君臣妄自尊大奪職歸起知靜江府入為工部
 尚書未幾罷去

宋史

王棠字子思大觀三年進士紹興五年以左朝奉郎知江陰軍

請立學官教授給田以養士遂詔范雱充教授棠又刻春秋
 三傳於學雱亦篤意訓率風俗為之大變又請於尚書截留
 秋苗以為軍儲其他善政多類此

盧志

鄭作肅字恭老宣和三年進士歷通判杭州紹興五年知常州
 初唐獨孤及為刺史有甘露降於廳事作肅因創凝露堂自
 為之記二十四年知吉州還朝奏郡中歲輸黃河竹索錢河
 久陷偽境錢何從歸乞賜蠲免其他循襲似此者亦乞盡行
 除放高宗嘉納且諭秦檜稱獎再三檜怒諷以在任不法與
 大獄繩治之逮吏及門以檜死得免二十八年知鎮江府嚴
 殺牛之禁有牛奔至府治果將就屠者人皆異之三十二年

冬改知湖州孝宗卽位手詔獎諭隆興二年歲歉民貧有生
子不舉棄於道路者作肅令屬官等訪收取又擇乳母保養
月給米一石贍之委請學官專蒞其事條具事目刻石州學
遂爲此邦著令盧志

邊知白字公式裕次子宣和六年進士孝友純誠清虛寡欲號
爲吉人爲吳縣尉紹興中歷戶部郎官將作監戶吏二部侍
郎直學士院嘗使金聞欲寇蜀歌蜀道難以諷之遂輟西南
之役官至吏部尚書同安縣開國侯卒贈徽猷閣待制吳郡志盧

志合纂

凌哲字明甫宣和中進士高宗朝自明州通判召對擢爲御史

數日遷右正言初周望守平江金兵入寇望遁去以罪責死
連州至是其家自陳詔復故官澤及其子哲因追數望棄城
罪惡竟寢其命及上疏論秦氏親黨因緣科第有妨寒峻進
取之路又奏王會前知湖明二州及移平江恃權貪酷乞投
竄遐裔以爲慢令賊民之戒會竟編管循州遷左司諫吏部
侍郎兼侍講以敷文閣待制知台州遂退歸鄉里十餘年卒
年八十六哲爲人澹約自守雖處侍從不啻寒素非時未嘗
至郡府鄰有茶肆日爲市井俚俗所聚哲徙避之人服其德
量目爲凌佛子盧志

富元衡字公權嚴曾孫幼入太學有聲擢進士第調隨縣主簿

蘇州府志 卷五十一
建炎初爲襄陽撫司機宜都督張浚以才薦改秩爲諸王宮大小學教授大中正丞紹興十一年以宣教郎知江陰軍十二年詔諸路州學委守臣修葺具次第驛聞元衡出緡錢五十萬鳩工掄材庸閒民以服役閱月而功成嘗辨盜之不應死者全活數十人皆感泣改興國軍二十六年知袁州逾年遷湖南常平改利州路提刑蜀舊例監司交饋不下數千緡元衡悉拒不納再移湖北專以平反爲心隆興中召還中途遇盜行李爲之一空帥李師顏餽以匣金元衡不啓緘謝絕之除工部郎中嘗曰吾家以清白相傳今不翅足矣疏乞骸骨詔以內閣奉祠制詞有知止不殆之語元衡因揭知止名

其堂以慶禮成賜金紫官至朝散大夫卒年八十六元衡守

節清慎終始不渝倣蘇軾書能逼真尤善柳葉篆

盧志

麋師旦字周卿其先胸山人建炎間始來平江父錯字公範登政和進士第爲確山縣市易務由博士持使節與秦檜議不合棄官去號知止居士贈金紫光祿大夫師旦年十七登進士第歷高郵西安二縣尉通州南康軍衢州三郡教授授宣教郎知富陽縣歲旱澇民饑極力拯救易鹽官丞究心荒政淳熙十三年辟御史臺主簿轉朝奉大夫除秘書郎紹熙三年權刑曹郎官五年知秀州賑卹荒災民不告病慶元初以尚書左司郎中召適金國賀生辰使至以顯謨閣學士正議

大夫提舉萬壽觀兼侍讀咸安郡開國侯充接伴使卒年六十七累贈正奉大夫

盧志

范成大字至能吳郡人紹興二十四年擢進士第授戶曹監和劑局隆興元年遷正字累遷著作佐郎除吏部郎官言者論其超躡罷奉祠起知處州處民以爭役囂訟成大爲創義役隨家貧富輸金買田助當役者甲乙輪第至二十年民便之詔頒其法於諸路處多山田通濟堰久壞成大訪故迹疊石築防置隄閼四十九所立水則漑灌有序民食其利刻重修堰規於石除禮部員外郎兼崇政殿說書隆興再講和失定受書之禮上嘗悔之遷成大起居郎假資政殿大學士充金

祈請國信使國書專求陵寢蓋汎使也上面諭受書事成大乞併載書中不從金廷使慕成大名至求巾幘效之至燕山密草奏具言受書式懷之入初進國書辭氣慷慨金君臣方傾聽成大忽奏曰兩朝旣爲叔姪而受書禮未稱臣有疏措笏出之金主大駭曰此豈獻書處邪左右以笏標起之成大屹不動必欲書達旣而歸館所金主遣伴使宣旨取奏成大之未起也金廷紛然太子欲殺成大兄越王止之竟得全節而歸除中書舍人張說除簽書樞密院事成大留詞頭七日不下又上疏言之說命竟寢知靜江府除敷文閣待制四川制置使教閱將兵修堡砦謂西南諸邊黎爲要增兵五千

奏置都監路蜀中名士孫松壽樊漢廣挂冠不仕成大表其節詔召之皆不起蜀士由是歸心凡人才可用者悉致幕下用所長不拘小節其傑然者露章薦之往往顯於朝位至二府召對除權吏部尚書拜參知政事兩月為言者所論奉祠起知明州奏罷海物之獻除端明殿學士尋帥金陵以病請閒進資政殿學士再領洞霄宮紹熙二年加大學士四年卒

盧志初封吳郡開國侯進封吳國公卒贈少師追封崇國公諡文穆成大素有文名尤工於詩

自號石湖有石湖集攬轡錄桂海虞衡志行於世宋史

顧禧字景繁郡人祖沂字歸聖知龔州父彥成字子英靖康中兩浙轉運副使皆有賢名禧雖受世賞不求仕進居光福山

中閉戶讀誦博極墳典著書甚富與吳興施元之注蘇子瞻詩尤詳紹興間郡以遺逸薦閒居不出者五十年名重鄉里築室邳村表曰漫莊自號癡絕叟盧志

孫緯字彥文擢進士第歷宗正寺丞官至尚書郎為人誠朴好以俗語為詩文而近理尤精於一時典故及巨室大家名系世次無不通曉嘗著集謚總錄本朝人物志行於世盧志

徐蕺字子禮林子由進士知饒州以居吳去親遠奏易旁小州便養乾道初改知江陰軍作新廟學刊書以惠學徒二年詔遣轉運副使姜詵按視水利蕺延見父老審訂其說謂江陰北臨大江地洿下港瀆善淤夏秋淫雨浙西數郡百川並委

瀕港七鄉並湖三山低印之田混為一區十年間沒者百六十餘萬畝歲蠲秋苗一二萬計公私病焉遂請治蔡涇廢牐牐之故基距河差遠兩翼迫感波流悍急易於潰壞乃移基並東直抵漕渠斥而大之易木以石長各十三丈四尺高一丈八尺洪闊二丈三尺岸之西北滙為渦壘分殺水怒土木鐵石之工萬有九百費錢二萬二千三百緡米一萬一千四百石各有奇於是增浚漕渠下通黃田以防泛溢絕壅滯五旬而畢又奏本軍地狹民貧有續添認納臨安府買紬絹四千餘匹兼累遭大水百姓憔悴因此重斂上為蠲八之五命下之日歡聲動阡陌三年改浙東提舉常平知秀州葺有學

尤善漢隸書盧志

王介字元石

史云金華人志謂郡人

從朱熹呂祖謙游登紹熙元年進士

第三簽書昭慶軍節度判官除國子錄上疏言壽皇親挈神器授之陛下孝敬豈可久闕孝宗崩又力請上過宮執喪言辭激切人歎其忠寧宗即位介上疏言陛下即位未三月策免宰相遷易臺諫悉出內批非治世事遷太學博士時韓侂胄居中弄柄疑介前封事詆己怨之添差通判紹興府尊知紹武軍會學禁起姚愈劾介偽學之黨且附會前相汝愚主管台州崇道觀久之差知廣德軍歷知饒州召為秘書郎遷度支郎官奉祠除都大坑冶侂胄誅召還累除國子祭酒會

不雨詔百官指陳闕失宰相史彌遠以母喪起復介手疏歷論時政乞令彌遠終喪除秘書監陞太子右諭德在春宮篤意輔導每遇講讀因事規諫遷宗正少卿兼權中書舍人繳駁不避權貴除起居舍人乞補外知嘉興府歲餘知襄陽府京西安撫使徙知慶元府兼沿海制置使以疾奉祠卒贈中

大夫寶章閣待置諡忠簡

宋史 按盧志謂介本郡人因學於呂祖謙徙居婺州之金華舊志

相承如此事或有據故仍列人物

周南字南仲博學無所不通與孔元忠滕成皆從葉適游紹熙元年對策言陛下聰明為小人蒙蔽抱才負學之士以道學棄之其中立不倚者又指為道學之黨而不用唯其不能可

否無所執守而自為賢智然後竊箕子之說為自便之地而建皇極之論起夫箕子謂有為有猷有守乃有才有道有操執之人也今所指道學朋黨者正皇極所用之人奈何棄天下材能執守之賢取其庸愚奸妄用之而謂之建皇極哉又云陛下近逐一讒諂權賄之小人而卷舌之星為之不明者累月若積其實德每事如斯何求而不得是時閣門舍人姜特立得幸留正奏出之故南言如此考官得其文驚歎擬奏第一適鄭湜有奏光宗顧謂大臣曰湜疏才入六日爾南何自知之乃格寘乙科之首當時中選者自媿在南右授滁州教授時論者益攻道學南婦翁黃度忤權貴為御史所劾差

南常州推官以父憂不行主管吏部架閣文字幹辦浙東茶鹽司公事開禧三年召試館職尋改文林郎秘書省正字母喪服除再入又以言罷卒所著山房彙前後集合四十卷子深原嘉興丞知太平縣

盧志 按宋史黃度傳後附南傳其辭與此不甚同二傳相較似志為近

實故仍之

滕成字季度郡人元祐黨籍友之曾孫知道州珙之子成沈敏好學耽研經史惟不喜習制舉文嘗居父喪讀張子韶孟子至形色天性之說自是警悟安於退處不急仕進淳熙中以賢良召試文飄疾午漏不移晷即就考官疑其輕已大怒以四通不合近制擯之後雖再召薦者不絕處之泊如也晚居

齊門窮僻處官於吳者知其賢多就見之清語終日終不及私葉適奏其學行特授號廉靖居士卒年六十五葬常熟

盧志

龔頤正字養正本名敦頤其先歷陽人元祐黨人兵部侍郎原之曾孫父相字聖任知華亭縣甚著聲績遂家吳中頤正用洪丞相門客恩為登仕郎嘗著符祐本末三十卷又著元祐黨籍三百九人列傳所佚者六人而已淳熙末洪邁領史院奏授下州文學補迪功郎監潭州南嶽廟光宗受禪改今名用薦主管吏部架閣文字遷太社令宗正寺主簿著續稽古錄言韓侂胄定策功擢兼資善小學教授遷樞密院編修官嘉泰元年詔頤正學問該博賜進士出身兼實錄院檢討官

預修光孝二宗實錄未幾遷秘書丞卒侂冑死有詔毀續稽古錄頤正有文名爲范成大周必大所稱著書甚多有中興

忠義錄續釋常談二十卷

盧志

麋深字子長師旦子初以郊恩授如臯尉登慶元五年進士第改和州司戶參軍嘉定七年知廣濟縣崇庠序督課試邑苦役法深諭民自得差次率無橫擾獄訟衰止講行荒政勸率富民得椿積三萬緡告糴旁近米值頓平又請於秋苗外別置義倉出公帑糴米儲之謂之官社有田於鄉者更勸出粟謂之民社各廩於鄉每一鄉爲兩倉擇鄉所推信者三人掌之謂之社長又聚穀於倉每春量丁口多寡許鄉民借貸秋

成每石取息二斗耗五升以折庸賃之費五年息及本則歸本於主又五年息又及本復以息之半酬之民社旣豐則賑糴以還官社仍再糴以實穀廩焉其區畫事目凡十條編次成帙上之於州州鏤版下屬邑且爲申請旌賞洎去官民泣送至百里外爲立生祠通判吉州臨安府差監察御史首論苛玷臺列輕儇妄庸之人又論年來受納秋苗之弊詔下諸路轉運鏤版禁約理宗卽位除右正言奏畏天悅親講學仁民四事又論邊備宜蓄威望以開重寄示恩信以服義旅廣招刺以固邊障便收糴以省漕運又論賞罰之弊及官屬泛濫請從省罷科目具文請定限制三軍招刺請先擇子弟差

役紛爭乞主義役時臺臣請上謁原廟議自溧始也又上定規模正紀綱振起人才肅清官列擇監司守令選將帥愛民強兵八事詔舉賢能首薦丹陽劉宰溧在臺諫所劾十一人悉當其罰寶慶初除宗正少卿明年改太常少卿尋乞外任除直顯謨閣浙東提刑俾郡縣各置代歷以絕欺蔽劾治屬吏之故縱失入留獄任情者三年詔兼本路常平以疾轉朝議大夫秘閣修撰致仕卒年五十六贈銀青光祿大夫溧學問充實性稟純厚謙退孝友恪守清介臨政勤敏立朝正色有循吏之風大臣之節其居諫職不肯順旨劾真德秀由是去國名重當世

盧志

王可大郡人嘉泰中知武岡軍能以惠政蘇疲民清靜鎮俗嘗以郡民信禳祥不喜醫藥往往殞於非命遂以成無已傷寒名理論藥方說許知可傷寒歌刻本以惠是邦人多稱之

盧志

李韶字元善彌遜曾孫父文饒爲台州司理參軍每謂人曰吾司臬多陰德後有興者韶五歲能賦梅花嘉定四年與其兄寧同舉進士授南雄州教授調慶元丞相史彌遠薦士充學職韶不與袁燮求射圃益其居韶亦不與燮以此更敬韶薦遷主管三省架閣文字遷太學正改太學博士上封事諫濟王竝獄又救太學生甯式迂學官勾外添差通判泉州改知道州葺周敦頤故居錄其子孫於學官且周其家紹定四年

行都災應詔言事提舉福建市舶會星變又應詔言事入爲
國子監丞改知泉州端平元年召明年轉太府寺丞遷都官
郎官尙左郎官未幾拜右正言奏乞以國事邊防二事專委
丞相鄭清之喬行簡各任其責論汰兵節財及襄蜀邊防又
論史嵩之王遂和戰異議迄無成功請出遂於要藩易嵩之
於邊使各盡其才史宅之將守袁州韶率同列一再劾之俱
不報乞解言職拜殿中侍御史辭不允時魏了翁罷督予祠
韶訟之願亟召還處以台輔又劾陳洵益刑餘弄權乞與外
祠女冠吳知古在宮掖招權納賄宜出之帝怒韶還笏殿陛
乞歸會祀明堂雷電免二相以韶權工部侍郎正言遷起居

舍人復疏洵益知古不報辭新命不許應詔上封事幾數千
言帝諭左右曰李韶真有愛朕憂國之心凡三辭不獲以生
死祈哀帝感額謂曰曲爲朕留退復累疏乞外以集英殿修
撰知漳州號稱廉平嘉熙二年召明年上疏乞寢召命言有
不敢進者四四年詔趨赴闕遷戶部侍郎五年改禮部侍郎
皆再辭不允令所在州軍護遣至闕嵩之遣人語曰毋言濟
邸宮媼國本韶不荅上疏以魯季氏世卿風嵩之時杜範亦
在列二人廉直中外稱爲李杜遷吏部侍郎兼中書舍人三
辭不許淳祐二年疏言大臣用人守法之非又及濟王國本
宮媼三上疏乞歸以寶章閣直學士知泉州旣歸三辭提舉

鴻慶宮五年再詔本州勸勉赴闕遷禮部侍郎權禮部尚書復三辭不許詔又疏論嬪妃貴戚世臣理財濟邸女冠儲嗣言甚危切擢翰林學士兼知制誥兼侍讀又三辭不許嵩之服除有鄉用意詔同從官抗疏請正其罪詔嵩之勒令致仕既而嵩之進觀文殿大學士韶疏爭之甚力七年韶十上疏旬去以端明殿學士提舉玉隆宮卒年七十五韶忠厚純實平粹簡淡不溺於聲色貨利默坐一室門無襍賓云宋史

朱天錫郡人嘉定十年知丹陽縣盡心撫字務在不擾修創公宇留意學校邑人生為立祠十四年以通直郎知武進縣官

至知台州

盧志

王柟字汝良節愍公倫之孫父述通判平江府初述負倫骨自河間返葬郡之陽山遂家吳中開禧中和議成柟為城南廂官帥臣言其有異才被命出使擢帥淮西進尹臨安皆有聲

績

盧志

孟猷字良甫元祐后族也祖忠厚封信安郡王判平江府父嵩字嶠之直秘閣浙西安撫使參議官猷居郡之間邱坊嚴己恕物不立厓岸立朝無黨與未嘗示人以同異之迹歷婺州通判又知婺州四持使節所至皆安其政令官至朝議大夫太府卿兼刑部侍郎卒年六十七弟導字達甫與猷俱學於葉適導通判臨安府盡心職務諸司交薦之三遷大理正知

江陰軍官至太中大夫盧志

黃士毅字子洪虎子幼知嚮學年三十徒步入閩謁朱子命曰
觀一書夜叩所見告以靜坐勿襍喚醒勿昏居數月授以大
學章句而歸正慶元詆排道學時也平生著書甚多嘗撰次
朱子書說七卷文集一百五十卷語類一百三十八卷并自
類注儀禮知府王遂為買宅以居稱考亭名士卒葬丹陽子
芝老開慶進士盧志
章康字季思甫四世孫安貧樂道隱居城西田屋粗給閉戶不
染世俗出入徒步人尊稱之曰聘君平生足跡未嘗越州境
而四方之人無不知有章季思士大夫過吳以不見為歎嘗

問學於朱文公默有所契日以詩陶寫遇紙即書人人取去
以此終身不厭年七十步履如飛或訝其有方外之遇康曰
吾師聖賢無外學也淳祐五年忽謂子仲肯曰吾死有期預
書墓明年果卒年七十九終時正寢梁壞有聲人皆異之所
著雪厓文集十卷詩集五十卷盧志
王埜字子文介子以父蔭補官登嘉定十三年進士第仕潭時
師真德秀一見異之延致幕下遂執弟子禮歷樞密院編修
兼檢詳繼為副都承旨拜禮部尚書所陳奏皆明正剴切鑿
鑿可行其為兩浙轉運判官以察訪使出視江防自嘉興至
京口增修官民兵船守險備具知鎮江府以守江尤重請免

鎮江水軍調發專一守江置游兵巡江上增創水艦就揚子江習水戰登金山指麾之淳祐末遷沿江制置使江東安撫使行宮留守巡江引水軍大閱舳艫相銜二十里講行屯田修飭行宮推京口法創游擊軍萬二千蒙衝萬艘江上晏然寶祐二年拜端明殿學士簽書樞密院事封吳郡侯與宰相不合言者攻之以前職主管洞霄宮卒贈特進堃因德秀知朱熹之學知建寧府創建安書院祠熹以德秀配有奏議文集若干卷堃工歌詩書法歐陽詢署書尤清勁

宋史

麋舜字伯升溧子以祖師旦郊恩補將仕郎乾道三年中銓試授迪功郎端平初監無爲軍襄安鎮實濡須要衝三年北兵

益張舜習射訓兵修器械易旗幟軍容士氣一新知軍丁仁以三鄉民兵俾舜總統提舉羅愚薦於朝嘉熙二年以兵射發策舜卽所閱歷敷陳知貢舉游似異之擢進士第差行在豐儲西倉斛面譏察官淳祐初北兵至通州時議以防江爲急舜上五事曰置砦屋以廣江防給閒田以復流散選土豪以任團結嚴閒探以闖敵情復山水砦以限虜騎之衝六年知長興縣歲荒糶糴舜出告身抵義倉米千餘石以活餓人帥祁巖勘與鄰境鬪爭嘯聚數千人舜奮身撫諭皆得其平尋改來安縣秩滿充淮西安撫機宜轉朝散大夫差知廉州未行改安慶府又改無爲軍開慶初以趙葵薦除將作監丞

沿江宣撫司參議官差知處州改安慶府景定初疏奏法堯
舜十二事上獎納且戒以惠養遠民下車首遏貪暴扶植善
良重賞格以嚴教閱建小學以拯文風決滯獄正誣枉在官
四年境有嘉穀之瑞父老生爲立祠轉朝議大夫封吳縣開
國男卒年七十七

盧志

康弇字仲昭溧次子以父致仕恩調崇仁丞知山陰縣邑苦催
科弇釐正稅長所收不趣而辦移丹徒縣先是縣官接送凡
納堂日用百需悉出於吏吏並緣爲姦名白納錢里正破產
不能支春夏之交輒預借苗錢民重困弇首嚴納堂之禁催
科則設匭使自投繳民不復用一錢又每都置人直縣給里

正紫袋俾往來有公事吏不得高下其手舊有折麥折羅二
錢弇併爲一遇旱輒躬自檢實不以屬吏由是執役戶或終
歲不入縣門諸司交薦由淮東安撫機宜通判揚州改江東
安撫司參議知建昌軍歷大府寺丞改度支郎官輪對首奏
畏天愛民講學修政求賢聽言六事上問近日貪風未革弇
乞獎廉首以陳塏陳昉對等兼權右司時丁大全陰奪政柄
弇守正不阿出知台州州有鬪卒驕蹇日甚弇密訪倡亂者
上制司誅之一州懼伏卒爲大全所中罷去除侍左郎中遷
尙書右郎中弇在銓衡人皆憚於私請等罷去除將作監淮
東總領兼知鎮江府圍田租取斛面尤甚弇至悉從寬減舊

買軍需取贏率三數年後方能追及倍稱之息囚繫多死者
弇抑不行力請宣限支給恒使有儲聲績甚著久之差知安
吉州改知吉州繕城郭甃衢路作簽聽葺浮梁以濟不通州
人名曰麋公橋詔兼提舉江西常平景定五年卒年五十九
弇性孝友睦族卹貧傲范公義莊規約所至吏不能欺豪右
屏跡立朝議政尤知大體平居奉養清約燕游玩好絕不留
意盧志

朱寢炎字明叔良五世孫幼穎悟以祖處大蔭授將作郎寶祐
二年銓中授迪功郎海鹽尉改泰州司戶參軍咸淳三年調
定城簿七年轉真州司法參軍制置使印應雷知州王起宗

朱煥咸稱廉敏聽訟決獄深得其情多以郡政委之先是軍
餉所收綱米每病拙惡寢炎斥去綱人饋送事例積弊屏除
在郡有鑿江倡和集寢炎性倜儻善持論見義必爲晚號梅

村樵叟爲詞章慕朱希真亦曰樵唱集卒年六十二盧志


孟文龍字震翁亞聖之後宋昭慈后五世姪孫也高祖信安郡
王忠厚鎮吳遂占籍爲吳人初以世賞補將仕郎後中銓試
受迪功郎監華亭船場調嚴州錄事參軍再調兩浙西路安
撫司準備差遣時賈似道枋國百僚多隳法就風旨文龍獨
守職屢忤其意不少回丞相章鑑樞密趙順孫交薦不報調
從政郎浙東提舉常平幹辦公事丁內艱不行始自咸淳以

來被命主昭慈祀事元兵歷吳文龍奮激與守臣議不合返
 哭昭慈廟後平章史弼等薦起之文龍致書曰文龍未死慙
 負神明羣公相國以忠孝文龍為羣公起將何以令今之事
 君者敢以死辭遂止不出戶庭者三十年著易解大全三十
 卷子潼字宗鎮官至松江府判官篤學勵行嘗即故居建鄒
 國公祠創性善家塾以教其族黨盧志
 張慶之字子善其祖從建康徙吳父明字子聰氣岸奇偉慶之
 少有志操為舉子業逮長棄不習出入經史百氏精思積年
 擬太元作測靈又撰孔孟衍語絕意仕進好為山水之游著
 虎邱賦因號海峯野逸做五柳先生作海峰遺民傳以伯夷

蔣詡陶潛司空圖自况且謂沈冥似海峻厲似峰時人尚其
 狷介初文天祥知平江慶之齒諸生之列洎國亡集杜詩備
 述天祥平生大節有海峰文編并老子注測靈衍語續胡曾
 詠史詩若干卷盧志

元

周才字仲美其先自浦城遷吳嘗領沿江制機檢察水部兵乙
 亥革命征南行省帥府檄才與武弁分撫郡之屬邑時軍伍
 貪恣日事剽掠才撫諭之又枯人輸物不愜則魚貫斬首才
 悉解纍械釋之士卒掠他處生口賈鬻才為館穀詢其鄉里
 父母歸之同里朱氏蘇氏世讐朱賂千戶期一夕蒸蘇氏而



屠之亦欲賂才才潛招蘇語其故俾亦陷千戶以利兩全之
因招二氏曉以禍福令約爲姻親遂釋怨丁丑歲有姦俠謀
衰謀以動吳民才嘆曰吾始預撫安今茲不復順義一旦官
兵來吳民其無噍類乎因諭以氣運在天不在人之理噤其
姦不得發乃亟給帥闕撫諭符文迎勞官兵遂不入境人得
以寧比境來避者亦廩給之後置縣設官領戶算同寅上其
功才曰吾前朝賤士也所以與世委蛇誠不忍生民塗炭耳
茲得爲太平民幸矣忍復希名位哉遂老於耕桑嘗著宋史
略十六卷吳塘集若干卷子文英以儒克世其業有澤物親
民二橐庭芳集盧志

俞琰字玉吾吳縣林屋山人人生宋寶祐間以詞賦稱宋亡隱居
著書不復仕進以義理之學淑諸人於書無不讀精於易學
尤好鼓琴旣老自號石澗卒於元貞間年七十所述諸家易
說百餘卷名曰大易會要自注上下經并十翼四十卷名曰
周易集說又有陰符經解一卷周易參同契發揮三卷易外
別傳一卷幽明辨惑二卷書齋夜話四卷席上腐談二卷弦
歌毛詩譜一卷男仲溫克承其志孫貞木自有傳盧志
湯彌昌字師言宋大理少卿壽四世孫父暉志咸淳進士彌昌
元初爲長洲崑山教諭鄱江清獻兩書院山長建康路學教
授轉瑞安州判官致仕生平篤學以文名於時所著有周禮

解義碧山類橐湘江權歌盧志

陳深字子微世爲吳人生於宋習舉子業宋亡棄故習篤志古學閉門著書有讀易編詩編春秋編弟子受業者戶屢恒滿江浙參政王都中亦出其門嘗寓意筆札天歷間奎章閣臣以能書薦潛匿不出以終別號寧極學者稱寧極先生子植字叔方少負才氣喜與侷儻之士游旣而折節讀書克繼父業有孝行晨夕躬事庖饌親之中裙廁膾手自浣濯更世變以琴書自娛辟召皆不起盧志

徐雷龍字幼成宋淳祐間名綴解榜授登仕郎穎悟夙成博學多識嘗從狀元阮登炳習舉子業爲時論所重有澣溪三絕

之名謂雷龍之論黃竹野之策劉浩然之賦也元初以達官

薦授武進縣學教諭不就屏居光福山中以終盧志

湯仲友字端夫先名益淹貫經史氣韻高逸學詩於周弼早登知府二吳之門浪迹湖海晚復歸吳自號西樓有北游詩集

其過葛嶺賈相宅一篇最爲人所稱盧志

高常字履常一字可久性嗜吟咏所居有宜靜齋編唐人詩於其所自有詩五卷名覆瓿集晉陵尤煇汶陽周弼廬山馮去非爲之序常清癯灑落晚以竹鶴自號卒年六十四無子捐宅爲妙智僧舍又顧逢字君際舉進士不第學詩於周弼稱爲顧五言自署其居爲五字田家放情山水間隱於臨安別

號梅山樵叟有詩十卷傳日本僧後辟吳縣學官卒年七十
 四所著船牕夜話一卷負暄雜錄一卷陳瀧字伯雨紹興初
 自汴徙家於吳瀧博涉經史百氏最深於春秋晉書鄉薦漕
 試皆不第放浪山水侷儻有晉人風致從周弼馮去非為詩
 有澹泊集九卷晚號碧澗翁子鐸字子振錡字子敬能世其
 業瀧與湯仲友高常顧逢皆端淳名士同郡陳發嘗評癯鶴
 高樓梅清澗幽為四詩之趣發子永輯為一編名曰蘇臺四
 妙發字伯和所居號竹深永字子久

盧志

宋无字子虛家毘陵以兵亂遷吳父國珍辟平江帳前提舉至
 元辛巳國珍領征東萬戶案牘適病痿无代之入海抵竹島

風電交作隨驚濤上下經高麗諸山罹沈疴瘦骨柴立未嘗
 廢吟咏歲丁亥舉茂才以奉親辭時科舉廢遂專工為詩比
 對精切造語新奇與鄧光薦趙孟頫馮子振友善所著有翠
 寒集吟嚙集霽迺集寒齋冷語年八十一卒

宋无自誌馮子振序合纂

范文英字彥材文正公八世孫承直郎淮安司法參軍邦哲之
 子幼孤依外家文氏讀書為學強識絕人至元間用薦署信
 州廣信書院山長改處州獨峯書院比至後代者王某已領
 職遂歸若不為意再改湖州安定書院授紹興路教授將上
 一日過友人杜元父有客在次語杜曰某千里求升斗以養
 幸得一官為學者師當代范文英滿缺期尚三載旅此不克

歸無資自給歔歔泣下詢而知爲曾小隱也文英遽曰我卽范文英今耄矣無能爲也子其行乎明日遂往候贈以所服袍笏且助其道里費時咸義之等以將佐郎平江路教授致仕文英自泰定主奉大宗祠祀越二十三年董正譜籍申明先世義莊規矩禮致名師教養族人請於朝卽祠建文正書院縉紳多之

盧志

干文傳字壽道平江人祖宗顯宋承信郎父雷龍鄉貢進士宗顯之先世以武弁入官而力教其子以文易武雷龍故兩舉進士宋亡不及仕及生文傳乃名今名以期之文傳少嗜學十歲能屬文未冠用譽者爲吳及金壇教諭饒州慈湖書院

山長仁宗詔舉進士文傳首登延祐二年乙科授同知昌國州事累遷長洲烏程兩縣尹陞婺源知州又知吳江州文傳長於治劇所至俱有善政始至昌國卽能柔以恩信海島之頑獷剽掠者爲之變俗長洲爲文傳鄉邑文傳徙榻公署無事未嘗輒出親舊莫敢通私謁會創行助役法凡民田百畝令以三畝入官爲受役者之助文傳諭豪家大姓以腴田來歸中人家自是不病於役在烏程有富民張甲之妻王無子張納一妾於外生子未晬王逐妾殺兒焚之文傳聞而發其事得死兒餘骨王厚賄妾之父買鄰家兒爲妾所生兒初不死文傳命妾抱兒乳之兒啼不就乳乃呼鄰婦見見之躍

入其懷王遂伏辜婺源之俗男女婚聘後富則渝約有育其女至老死不嫁者親喪貧則不舉有停其柩累世不葬者文傳下車召耆老以禮訓告閱三月而婚喪俱畢宋大儒朱熹上世居婺源故業爲豪民所占子孫訴於有司莫能直文傳諭其民以理不煩窮治而悉歸之復募好義者卽其故宅基建祠俾朱氏世守焉有富民江丙游京師娶娼女張爲婦江客死張走數千里返其柩以葬前妻之子殺之官司利其賄不問文傳發其事論如法其治行往往爲諸州縣最論者謂其有古循吏風至正三年召赴闕承詔預修宋史書成賞賚優渥擢集賢待制以禮部尙書致仕文傳氣貌充偉識度凝

遠喜接引後進考試江浙江西鄉闈所取士後多知名爲文

務雅正不事浮藻其於政事爲尤長云

元史

張斐字子昭其先浚儀人南渡徙錢塘祖父始居吳斐少嗜學喜從儒先君子游時宋亡廿餘年故老遺黎猶有存者斐嘗從之問宋遺事得其什一歲游錢塘每覽山川城邑荒臺故墓必徘徊躑躅感歎不能已兼通聲律喜古樂府歌曲家臨市衢構樓蓄書自經傳子史下逮稗官百家無不備日繙閱研究性不喜人言科第得失與夫巧宦善富故貧窶終其身年六十四卒所著有繼潛錄等書子田字芸已讀書苦學能

紹父志

鄭元祐墓誌

朱德潤字澤民其先睢陽人宋兵部郎中貫之後避亂南奔遂爲吳人德潤自幼讀書一過輒能記長工詩善書札畫山水人物有古作者風延祐末游京師趙文敏薦於仁宗召見命爲國史編修明年英宗嗣位授鎮東行中書省儒學提舉又明年獻雪獵賦上奇之命泥金書內典及成而英宗又崩德潤曰吾挾吾能事兩朝而弗偶其歸飲三江水食吳門尊乎旣歸杜門讀書三十年至正十二年江淮用兵起江浙行省參謀官進言於平章曰民不識兵百年矣變生不虞宜以安集爲念凡擲兵來附者皆平民請一切貸之收復郡縣其功爲多攝守長興至則市無一人德潤招徠有法毗庶麇至以

病免十五年微疾卒年七十二有存復齋橐十卷

周伯琦誌

范成字性存本縉雲人文正公族也父霖元初以名儒召見授江浙儒學提舉轉禮部侍郎因往來於吳遂家焉成幼劬於學卓然有立獲親炙前朝遺老資性明達質厚氣完接人溫而莊治家有法吉凶慶弔一遵禮制家貧以經術教授隨才誘掖郡嘗禮致爲訓導所爲詩文和易平實晚年以次子同文知臨朐縣往就養未幾同文有故成病卒長子煥聞訃哭踊幾絕卽衰絰而往行半月捨舟而陸踰二千里始達自度囊空不敢啓窆西走濟南傭書獲資東還賃牛車舁父柩過穆陵諸岡牛疲則躬推輓過沐涉沂蹠皆駮塚八閱月始克

抵吳葬焉

盧志

邱迪字彥啓號雲麓沿江制使岳之四世孫

岳見流寓

家於吳迪生

六歲而孤養於外家孟氏成童時侍舅潼游匡廬白鹿洞讀

書得謁熊天慵天慵異之勉以義理之學虞井齋嘉其敦篤

俾訓諸孫待以賓禮及歸教授鄉里湯彌昌龔璠黃潛諸先

輩咸推譽焉少工尚書應舉再不利無復仕進想退讓自持

人亦弗敢與狎所著有尚書辨疑玉淵雜著雲麓文彙若干

卷盧志

蔣堂字子中父爲州幕長多施陰德生堂聰敏過人幼讀書有

大志及長以孝友稱與人誠敬從永嘉林寬學中泰定三年

江浙行省鄉試第三廣東廉訪使辟爲書吏不就隱居吳門

執經受業者不遠千里而至其後登左右榜者多其弟子至

正間用薦爲嘉定州學教授秩滿以疾終有詩文若干卷

盧志

陸友字友仁父業賈友攻苦於學善詩尤長五言兼工楷隸能

鑑辨鐘鼎銘刻法書名畫嘗至上都虞集柯九思薦之未及

用歸自號硯北生著硯史墨史印史有把菊軒彙吳中雜志

姑蘇志吳縣志合纂

湯文英字孟寬其先自華亭徙吳八世同居至元間表其門復

其家

姑蘇志元史孝友傳序有其名

金弘道字達可祖濤仕宋將仕郎至弘道聚族凡六世至正間

旌其門

姑蘇志

陳謙字子平吳人兒時卽知孝年踰五十二親尙無恙父病革思食鰕謙進鰕而父歿遂終身不食鰕事兄訓甚謹訓爲吏能律己以廉謙實左右之初謙師事處士林寬及教授龔璠皆勉以舉業試有司旣入院見兵卒搜檢無狀歎曰待士如此尙何徼倖一得爲哉卽罷歸盡棄舉子業潛心六藝旁覽百家而守之以約爲文馳騁上下尤善古賦及古今體詩虞集黃潛張翥皆極口論薦力辭乃止獨喜施予京口孫子翼與謙善有女貧不能嫁謙卽助貲爲畢嫁事丙申歲訓爲江浙行省照磨謁告還吳時張士誠兵適至訓謂謙曰汝無官

守宜自爲計謙曰兄在弟何所之俄兵突入其室脇訓拜不屈遂刃其胷謙以身翼蔽并遇害時年六十二門人范文炯求屍得之水中猶兄弟相倚立謙著述甚富兵後散亡獨周易解詁二卷及古今詩數十篇行於世

陳基誌

金道元字仲旻少孤父友長橋萬戶府鎮撫陳某養爲子至正戊子方國珍起兵海上江浙行省參政朶爾質班督師與戰時陳已進官都鎮撫以道元從初并師期集建寧之補門關國珍以書詐降陳受之意稍解道元曰賊志未可知不如嚴備之陳不聽國珍以蒙衝數百艘颿以赤布蔽日而下勢漸迫官軍猶晏然國珍乘風縱火矢石交注陳戰死不知所在

道元求之不得乃從舵樓中躍赴海祝曰吾父有靈幸使吾
 不為賊所得也已而恒若有人抱持之自旦及晡隨波上下
 忽止身石上登沙瀨數百步得小徑行里許乃知溫之壘水
 山也迨歸張士誠已據吳或薦其名於偽司徒李伯昇道元
 聞之挈妻孥去隱具區賣卜以終其身子問禮部侍郎自有

傳姑蘇志

王斌字嘉甫早孤好學事母賈甚謹斌為無錫州屬吏迎母就
 養每雞鳴起朝其母始出夕歸復躬進飲食母叩吏事斌白
 所行善則喜不善則減眠食斌一一體順其行事益謹母病
 斌不解衣不交睫奉侍藥餌及歿斌執喪哀慟骨立吳俗葬

其親以火斌惻然追傷其父營甌窆母閭門外復築亭原上

名曰思服踰祥哀泣如始喪跣造楊維禎門求記其所不妄

者吳縣志

葛乾孫字可久父應雷以醫名乾孫生有奇氣貌偉特膂力絕
 人好擊刺戰陣之法以至陰陽律呂星數靡不精究長乃折
 節治經研覃淵邃入試屢下遂棄去不求仕肆力古學為文
 章凌轍古今應雷取醫書授之乾孫稍治輒精而不屑施行
 或施之輒有異效至正壬辰徽寇轉掠蘇人震恐廉訪僉事
 李仲善請乾孫圖之乾孫勸築城以守而自往討賊李從之
 卒城之而事戢明年語光福徐顯曰聞中原豪傑方興而吾

不得與命也今六氣淫厲吾犯咸池殆將死矣明年果卒年四十九所著有醫學啓蒙經絡十二論傳姑蘇志

楊椿字子壽其先少師棟由蜀來吳遂爲吳人椿少聰敏讀書過目成誦及壯試於有司屢黜而志益勵尤好爲古文詞丙申歲元總兵參政脫寅時守吳辟椿爲參謀俾守婁門甫二日張士德引兵至門下衆潰去椿獨擐甲持弓禦之身被數創勢不支且大罵兵以戟裂其口血被體罵不絕而死其妻王氏被髮徒跣冒鋒鏑每尸三日不得幾被刃者數四旣又擗踊抱城門柱大呼訴其魁曰人孰無夫婦汝等專務殺人而來邪抑欲爲安民之計邪魁聽之禁其兵勿沮其往來乃

得尸於張香橋下輿歸葬之哀毀不食翌日夫之神憑王大言曰我已死汝無他志期五日當取汝與吾子女同歸及期王果死子穎十五歲女滿奴九歲皆一日亡其徒陳普字季周郡人也好學而文尙氣節士德之入吳兵踵普門使拜不肯屈且索婦女普罵曰若所爲寇耳遂被數創死盧志麋友信吳人喪父居喪適隣有火延燒舍傍友信抱父木主仰天哀號遂反風滅火人謂孝感所致盧志

王璫字仁仲吳縣人學有淵源工詩章書翰尤善鼓琴隱居不仕自號城南逸民張景吳中人物志

朱燧字子新吳郡人勵志苦節工爲詩詞尤善行草肆情山水

遇酒輒醉僑居笠澤之濱後不知所終

吳中人物志

唐元字本初郡人讀書博雅有船號一葦杭圖書古玩列置左

右浮游江湖日哦詩其中自號葦杭子

玉山雅集

蘇州府志卷第五十一

蘇州府志卷第五十二

人物六 吳縣

明

滕德懋字思勉吳縣人元季為浙江行省掾叅政朶耳只班討

方國珍辟為叅謀渡海颶風大作舟且覆德懋神色自若國

珍降留撫台州三年台人德之洪武初徵為丞相府掾從征

陳友諒除知信州以才力不逮辭改建昌府同知時友諒故

臣王溥守禦建昌所為多不法德懋以大義律之多所峻改

進知潭州再進湖廣行省左右司郎中三年召拜兵部尚書

坐事卒

明史云尋改戶部以事免官卒

德懋才辨豪爽器量弘偉其學長於

奏疏一時招徠詔諭之文多出其手子枋字用載有文學與

從弟權齊名

姑蘇志

杜寅字彥正吳縣人洪武初詔修元史徵寅為纂修官史成官

岐寧衛知事八年番賊既降復叛寅與經歷熊鼎俱被害

明史

張簡字仲簡吳縣人初師張雨為道士隱居鴻山元季兵亂以

母老歸養遂返儒服洪武三年薦修元史當元季浙東西士

大夫以文墨相尚每歲必聯詩社聘一二文章鉅公主之四

方名士畢至讌賞窮日夜詩勝者輒有厚贈臨川饒介為元

淮南行省叅政豪於詩自號醉樵嘗集諸名士賦醉樵歌簡

詩第一贈黃金一餅高啟次之得白金三斤楊基又次之猶

贈一鑑

明史

周砥字履道吳人僑無錫博學工文詞與宜興馬治善遭亂客

治家治為具舟車盡窮陽羨山溪之勝其鄉多富人與治善

者咸置酒招砥砥心厭之一日貽書別治夜半遁去游會稽

歿於兵

明史

楊基字孟載其先蜀嘉州人祖宦吳中生基遂家焉九歲背誦

六經及長著書十餘萬言名曰論鑒遭亂隱吳之赤山張士

誠辟為丞相府記室未幾辭去客饒介所明師下平江基以

饒氏客安置臨濠旋徙河南洪武二年放歸尋起為滎陽知

縣謫居鍾離被薦為江西行省幕官以省臣得罪落職六年

起官奉使湖廣召還授兵部員外郎遷山西副使進按察使
被讒奪官謫輸作竟卒于工所初會稽楊維禎客吳中以詩
自豪基於座上賦鐵笛歌維禎驚喜與俱東語從遊者曰吾
在吳又得一鐵矣若曹就之學優於老鐵學也

明史

王行字止仲吳縣人幼隨父依賣藥徐翁家徐媪好聽稗官小
說行日記數本爲媪誦之媪喜言於翁授以論語明日悉成
誦翁大異之俾盡讀家所有書遂淹貫經史百家言未弱冠
謝去授徒齊門名士咸與交富人沈萬三延之家塾每文成
酬白金鑑計行輒磨去曰使富而可守則然臍之慘不及矣
洪武初有司延爲學校師已謝去隱於石湖其二子役於京

行往視之涼國公藍玉館於家數薦之太祖得名見後玉誅
行父子亦坐死始吳中用兵所在多列礮石自固行私語所
知曰兵法柔能制剛若植大竹於地繫布其端礮石至布隨
之低昂則人不能害而礮石無所用矣後常遇春取平江果
如其法行亦自負知兵以及於禍云初高啟家北郭與行比
鄰徐貴高遜志唐肅宋克余堯臣張羽呂敏陳則皆卜居相
近號北郭十友又稱十才子

明史

周南老字正道本道州人濂溪先生後宋季徙吳祖才父文英
南老元季用薦授永豐縣學教諭改當塗縣代還會天下亂
省臣奏爲吳縣主簿僧普益殺人久不得尸南老移檄責縣

神次日覺羣鳥飛繞有異跡其所止獲尸於湖濱縣稱神明
尋辟爲浙省掾上書言時政六事曰開荒田節財用通鹽法
息奔競辨禮分公銓選除兩浙鹽運知事進淮南行省照磨
改江浙行省進擢本省理問明初徵詣太常議郊祀禮禮成
發臨濠居住數月放還又十六年卒年八十三南老端毅好
學其學本於義理而詳於制度所著有易傳集說喪祭禮舉
要姑蘇雜咏拙逸齋稿子敏字遜學洪武中任長洲學教諭
後與金華胡隆成同名以親老辭歸終廣東軍器局副使子
汝安溪主簿淵遂昌知縣孫綱字文敘以薦授廣西融縣丞
進知縣治融十八年有惠政成化中都御史韓雍以融人思

綱不忘奏綱子奎爲融丞未幾進攝知縣兼攝羅城懷遠二

縣後丁母憂改茶陵州判官卒

姑蘇志

錢達字伯行吳縣人父良佑字翼之博學工詩尤工篆隸元文
宗時嘗被旨書農桑輯要大學衍義廷臣交薦宜列館閣不
報至大間署吳縣教諭旣代遂不復出自稱江邨民達刻意
力學年四十餘猶無宦情至正開江浙行省分治於蘇始起
家授登仕郎江浙行省管勾架閣尋除本省檢校官歷左右
司都事陞淮南行省員外郎洪武初選詣太常議禮禮成發
居鳳陽未幾放歸後以事逮詣京卒達爲人淳厚雅飭稽古
考訂雖老不倦其書雖傳家學而論者謂特過之篆隸行楷

悉追古人妙處一時若叅政王叔能平章達兼善咸推重之
所著有櫓巢稿姑蘇志

葉顥字伯印吳縣人家洞庭東山父國英倜儻好結內名士儒
學提舉李祈國子助教宇文公諒並主其家故顥學有端緒
尤長於詩元季中江浙行省鄉試署和靖書院山長意頗不
樂挾策走燕京會天下亂流落濠亭閒比歸而家已蕩然故
人耿炳文以討張士誠累功封長興侯遣人招顥欲薦于朝
顥曰時去志違年幾知非無庸是為也乃益放情詩酒佯狂
自恣自稱浮邱醉史竟客死長興又有許睥光遠者亦家洞
庭洪武初應召至京獻詩又陳省刑薄稅之策以老乞歸賜

布袍放還今山中有許山人亭

姑蘇志

徐達左字良夫吳縣人少受易於鄱陽邵弘道又受書於天台
董仁仲值時多故隱居光福山中家故饒喜接四方名士復
延師家塾以教族子弟歲祭宴享會族眾於家講論詩書禮
樂升降揖讓有禮洪武初鄉人施仁守建寧請為其學訓導
師道克立居六年卒于學宮嘗注四子書有詩文六卷俞貞木傳
陳汝秩字惟寅父徵字明善自廬山徙居吳中有學行稱天倪
先生汝秩少與弟汝言齊名而性高亢不苟合汝言為張士
誠所辟親信用事聲勢甚盛汝秩安貧樂道若弗聞也洪武
初以人才徵至京以母老辭歸卒汝言字惟允闔爽有雋才

尤工詩畫張氏時為太尉府叅謀洪武初官濟南府經歷坐事卒子繼自有傳

姑蘇志 元在游寓今移入此而稍易其詞

顏琇字季栗吳縣人洪武初父濟民成鳳翔母韓從行留琇守坵隴越六年聞母訃琇即日奔赴函母骨以歸自陝抵吳踰數千里骨函未嘗著地寢則懸於屋梁渡則著之心胸父既老免歸奉養愈謹且必躬滌溺器家人止之曰此非爾所知也蓋其心恐親有疾每視溺以驗之其父固不知也後父卒琇哀號日夜絕而復蘇水飲不下咽越五日竟哭死子昌亦

有孝行

姑蘇志

姑蘇志有張阿童洪武初孝子因不詳其邑里附見于此

朱應辰字文奎吳縣人少治禮經為舉子元季屢試不中乃棄去從會稽楊維禎學為古文詞洪武初為郡學訓導後改江陰卒應辰博學多技能詩文行暢炳蔚尤精篆籀之學所著

有漱芳集三卷

姑蘇志

蕭規字元則其先湘潭人明初徙居吳江再徙郡城其學長於春秋毛氏詩讀書樂道不求祿仕人稱竹園先生所著有湖山樵寓集子二潭字孟南庚辰進士終建始知縣湘字仲南永樂中舉秀才授中書舍人終大理評事俱有文學

姑蘇志

沈右字仲說吳中世家能略去豪習刻志詩書年四十無子其妻鄒氏候其他適為買一妾頗有姿色及歸命出拜右詢其

家世始不肯言詢之再三泣而曰妾范復初女也父喪家貧母老見粥於此右惻然謂妻曰乃父吳中名士亦吾故人也豈可以為妾當如已女視之即尋其母使擇壻且備奩具嫁之友人高進道貧不能葬者十三喪右買地為之安厝

輟耕錄參

列朝詩集

王淳王洵郡人父鑄為都督府斷事洪武八年坐法當死淳兄弟日夜號泣爭詣御史請代淳曰淳聞父子一體父有難子不忍視請伏鑕以贖父罪洵進曰兄冢嗣宗祀所承洵死猶鴻毛爾兄弟交讓御史訊其執志堅定疏於上鑄得免死

姑蘇

志參劉鳳先賢傳

都嗣誠字文信吳縣人父思賢早卒母唐氏年二十七守死育之遭至正之亂家產蕩析惟有書數篋既長晝誦夜思寒暑弗怠有徐佑之者與思賢友善憐其少孤且才遂納為壻洪武初仇家誣佑之匿有罪人械赴京嗣誠曰徐公以我故不畜妾今我母已亡幸有子矣此非我報恩時邪遂冒姓名潛一日先行下刑部獄病革出獄而絕年三十五

王汝玉誌按姑蘇志作

都文信字士誠其辭亦多不同今用王志堅改本

梅應發居闔門市母嘗有病醫藥弗療剖股為羹以進母啖之疾已他日母復疾危甚應發露立北面稽首以香然頂灼臂叩天乞減已年以益母壽是夕天陰暝俄頃雲開盡見北斗

之六星惟一星尙沒頃雲復合及還見母擁衾坐床上言有
白衣者六人以水灌灑遂霍然而蘇詰旦母平復如常年八

十餘卒

姑蘇志

俞貞木初名楨字貞木後以字行更字有立石澗先生琰之孫
自少篤志問學力追古人既冠以學未成不娶負笈從永嘉
陳麟學易元季兵起杜門不出洪武初以薦授樂昌知縣丁
父憂服闋改都昌縣復以母憂去後以親族犯法例弗起郡
守姚善雅重之延以訓子無何會鄉人有辨曲直者妄以書
抵之被逮至京既白將歸病暴下卒時建文三年七月壬寅
也年七十一貞木爲人清苦敦行古道居官務崇禮化有古

循吏風晚歲益勵清節朝夕不繼澹如也所著有立菴集

王汝

王誌

錢芹字繼忠吳人少好奇節元末干諸將不遇洪武初辟大都
督府掾從中山王出北平至大漠還解職家居二十年安貧
樂道知府姚善敬禮芹輩以月朔會學宮迎芹上座請質經
義芹曰此非今所急也善悚然起問芹乃授以一冊視之皆
守禦策時燕兵已南下善薦芹於朝署行軍斷事從李景隆
北行遣入奏事道病將卒猶條上兵事年七十三

明史姚善傳

韓奕字公望宋魏公琦之後其先自安陽徙居吳之樂橋父凝
工醫載藝術傳奕幼端重簡默動作循矩度雖居廛市而樂

游覽放浪山水閒褐衣芒屨一童自隨往來山僧野客家累
 月不歸或時藉草而坐微吟長嘯人莫測其意性穎敏博學
 工詩與王賓俱隱於醫賓既為郡守姚善所禮乃復因賓致
 奕奕終不往一日與賓詣之奕走楞伽山善隨至奕泛小舟
 入太湖善歎曰韓先生所謂名可得聞身不可得而見也所
 著有韓山人集

姑蘇志

吳文泰字文度吳縣人喜為詩清才逸思雖憂困不廢吟咏與
 同郡丁敏為友日夕吟不休嘗閉戶共為詩人見其終日突
 無烟往視則方瞠目相對忘飢語益厲苦洪武閒文泰為涿
 州同知後坐事去官歸以詩自娛卒年七十四有愚庵集敏

字遜學固窮守志永樂閒流落江淮嘗館某氏師席有故人

自遠來訪主家無留意即束書要客歸主惶恐數謝過竟不

就飢寒死於道路

陳繼誌姑蘇志合纂

嚴德珉吳人由御史擢左僉都御史

姑蘇志云時洪武乙亥

以疾求歸帝

怒黥其面謫戍南丹遇赦放還布衣徒步自齒齊民宣德中

猶存嘗以事為御史所逮

姑蘇志云有西軍以調征過吳暴苦民家德珉奮殿之軍訟於御史

逮德珉對簿德珉跪堂下自言曾在臺勾當公事曉三尺法御史

問何官答言洪武中臺長所謂嚴德珉是也御史大驚揖起

之次日往謁則擔囊徙矣有教授與飲

姑蘇志云久之復歸樂橋繆御史讓延教

授李綺飲德珉與席見其面黥戴敝冠問老人犯何法德珉述前事因

言先時國法甚嚴仕者不保首領此敝冠不易戴也乃北面

拱手稱聖恩聖恩云

明史

郁新字銘本吳縣人從父徙臨淮

明史本傳作字敦本臨淮人今從解縉所撰墓誌銘神道

碑改

正 洪武中才徵授戶部度支主事遷郎中踰年擢本部

右侍郎嘗問天下戶口田賦地理險易應答無遺帝稱其才
尋進尚書時親王歲祿米五萬石新定議減五之四並定郡
王以下祿有差又以邊餉不繼定召商開中法令商輸粟塞
下按引支鹽邊儲以足建文二年以疾歸成祖即位召掌戶
部事永樂元年河南蝗有司不以聞新劾治之初轉漕北京
新言自淮抵河多淺灘跌坡運舟艱阻請別用淺船載三百

石者自淮河沙河運至陳州潁溪口跌坡下復用淺船載二
百石者運至跌坡上別用大船運入黃河至八柳樹諸處令
河南車夫陸運入衛河轉輸北京從之又言湖廣屯田所產
不一請皆得輸官粟穀糜黍大麥蕎稔二石准米一石稻穀
葛秫二石五斗稗稗三石各准米一石豆麥芝麻與米等著
為令二年議公侯伯駙馬儀賓祿二百石以上者請如文武
官例米鈔兼給三年以士卒勞困議減屯田歲收不如額者
十之四五又議收納米北京贖罪者於南京倉皆允行是年
八月卒於官帝歎曰新理邦賦十三年量計出入今誰可代
者輟朝一日賜祭葬新長於綜理密而不繁其所規畫後不

能易明

許思温字叔雍吳人洪武中以國子生署刑部主事累官北平

按察副使燕師起思温佐城守有勞擢刑部侍郎改吏部兼

贊善以漢王高煦讒下獄瘐死仁宗立贈吏部尚書官其子

俊贊善郎進學翰林

明史

滕用亨初名權字用衡德懋從子少從德懋遊學四方頗多見

聞問學辨博文詞爾雅尤精六書之學篆隸之妙高出近世

永樂三年被薦時年七十矣召見試篆書麟鳳龜龍四大字

以進又獻貞符三詩稱旨授翰林待詔與修永樂大典在官

四年卒用亨善鑑古嘗侍帝觀畫卷未竟衆目爲趙伯駒用

亨曰此王詵筆也至卷尾果然

明史參姑蘇志

樓澄字文淵父紹自鄞徙吳澄生而孤母守節保訓成立母患

瘰癧卒澄終身不食粟早從貝翔學深於書晚更嗜易嘗教

駙馬都尉胡觀家及歸夏原吉與論水利欲薦之以疾辭有

林臯鼓缶等集子日宏世其業日宏子序字仲彝以文學稱

姑蘇志

陳祚字永錫吳人永樂中進士擢河南叅議十五年與布政使

周文褒王文振合疏言建都北京非便並謫均州太和山佃

戶躬耕力作處之晏然宣德二年試選謫諸臣祚策第一擢

御史巡按福建方面大吏多被彈擊禁止和買閩人德之還

奏白塔河上通邵伯湖下注大江蘇松舟楫多從往來淺狹
湮塞請開濬從之轉漕果便尋出按江西時天下承平帝頗
事游獵玩好祚馳疏勸聖學其畧曰帝王之學先明理明
理在讀書陛下雖有聖德而經筵未甚興舉講學未有程度
聖賢精微古今治亂豈能周知洞晰真德秀大學衍義一書
聖賢格言無不畢載願於聽政之暇命儒臣講說非有大故
無得閒斷使知古今若何而治政事若何而得必能開廣聰
明增光德業而邪佞之以奇巧蕩聖心者自見疎遠天下人
民受福無窮矣帝大怒下祚獄逮其家人十餘口隔別禁繫
者五年其父竟瘐死英宗立得釋復官再按湖廣以奏遼王

貴烺罪有所隱與巡撫侍郎吳政逮至京下獄尋赦出時王
振用事法務嚴峻祚上言乃者法司論獄多違定律如侍郎
吳璽誤舉主事吳軌宜坐貢舉非其人律乃坐以奏事有規
避律斬及軌自經死獄官獄卒罪應遞減乃援不應爲重罪
槩杖之一事如此餘可推矣天時不順災沴數見未必非此
帝是之以其章示法司尋改南京遷福建按察使僉事有威
惠神祠不載祀典者悉撤去久之以疾歸卒祚天資嚴毅雖
子弟罕接其言笑獨重里人邢量挾策質疑往往至暮明史
陳繼字嗣初生十月父汝言坐事死母吳氏躬織以資誦讀比
長從王行俞貞木遊貫穿經史人呼爲陳五經奉母至孝府

縣交薦以母老不就母卒哀毀過人永樂中復舉孝行旌其母曰貞節仁宗卽位開弘文閣帝臨幸問今山林亦有名士乎楊士奇初不識繼夏原吉治水蘇松得其文歸以示士奇士奇心識之及帝問遂以繼對召爲國子博士尋改翰林五經博士直弘文閣宣宗初遷檢討引疾歸卒繼爲人端恪其學自經史百氏皆博考深究文章根義理辨體製嚴矩矱不肯苟率一時稱爲作者所著有怡菴集子寬字孟賢完字孟英皆能文而寬尤長于詩

明史參
姑蘇志

楊翥字仲舉吳人少孤貧隨兄戍武昌授徒自給楊士奇微時流寄窘乏翥輒解館舍讓之而已教授他所士奇心賢之及

貴薦翥經明行修

王志堅云舊志傳皆言楊文貞薦按公自誌不然蓋武昌人郭存誠爲山東按察使

薦公于朝也

宣宗詔試吏部稱旨授翰林院檢討歷修撰正統中

詔簡郕王府僚諸翰林皆不欲行乃出侍講儀銘及翥爲左

右長史久之引年歸王卽大位入朝拜禮部右侍郎景泰三

年進尙書給祿致仕明年卒年八十五翥篤行絕俗一時縉

紳厚德者翥爲最旣沒景帝念之名其子肆入覲授本邑主

簿

明史

張有字繼孟別號夢菴雲之孫田之子少從金華宋濂學爲文有光燄作詩長於古風書效薛稷爲南辭新聲樂府一一臻妙廣穎修髯衣冠楚楚若神仙中人然隱約不仕年八十餘

卒杜瓊小傳

企問字公素道元子少受易俞貞木家貧無書常從人借讀無不通解永樂初被薦為司經局正字時宮僚多得罪問亦坐繫獄十年非義相餽皆不受時黃淮楊溥同坐繫三人相得甚省躬念咎之暇各持一經相與講論曰此處憂患之道也洪熙初命待詔思善門制授翰林修撰備顧問論時政得失悉見獎納宣德末擢太常少卿兼侍讀學士正統間調南京歲餘進禮部右侍郎卒於宮問文行敦茂義聞流著平生閱履否泰相尋而不變所操製述雅健善書得魏晉筆法星歷之學尤精然未嘗語人有集若干卷兄聲亦好古嗜學問事

之如嚴師嘗病熱劇醫云必得螺可治方盛寒問解衣循河

覓得百枚以進病良已子汝進太僕丞姑蘇志

袁政字文理嘗學於俞貞木永樂七年以薦授湘陰典史湘陰民素貧而惰於耕遇征調則破產政為勸課振勵自是民有蓋藏後以夏原吉薦遷遂安知縣未視篆宿於驛亭夢小兒被血者數輩挽其衣覺而問其父老知邑中生女多不舉即嚴禁之後縣民生女多名袁留姑蘇志

陳鑑字有戒吳縣人永樂十年進士授御史遷湖廣副使歷山東浙江皆有聲英宗即位之三月擢右副都御史鎮守陝西北方饑民多流移就食鑑道出大名見之疏陳其狀詔免賦

蘇州府志 卷五十二
役正統改元鑑言陝西用兵民困供億派徵物料乞悉停免
詔可明年五月以勞績下敕獎勵因命巡延綏寧夏邊所至
條奏軍民便宜多所廢置所部六府饑請發倉振帝從輔臣
請修荒政鑑請徧行於各邊由是塞上咸有儲蓄六年春以
鑑久勞於外命與王翱歲一更代七年翱調遼東鑑復出鎮
歲滿當代以陝人乞留詔仍舊任時倉儲充溢有軍衛者足
支十年無者直可支百年鑑以陳腐委棄可惜請每歲春夏
時給官軍爲月餉不復折鈔從之九年春進右都御史鎮守
如故時瓦剌也先漸強遣人授罕東諸衛都督喃哥等爲平
章又置甘肅行省名號鑑以聞請嚴爲之備已命與靖遠伯

王驥巡視甘肅寧夏延綏邊務聽便宜處置以災沴頻仍條
上撫安軍民二十四事多議行鑑嘗恐襄漢閒流民嘯聚爲

亂請命河南湖廣陝西三司官親至其地撫恤之得旨允行
而當事者不以爲意王文亦相繼力言有司怠忽恐遺禍至

成化時乃有項忠之役人益思鑑言

按雷禮列卿紀正統乙丑上念鑑久勞於外命

右都王文代還詔鑑專掌院事
商輅撰墓碑畧同明史失紀

英宗北狩景帝監國鑑合大

臣廷論王振於是振姪王山伏誅也先將入犯以于謙薦出
撫畿內事寧召還進左都御史景泰二年陝西饑軍民萬餘
人願得陳公活我監司以聞帝復命之鑑至是凡三鎮陝先
後十餘年陝人戴之若父母每還朝必遮道擁車泣再至則

歡迎數百里不絕其得軍民心前後撫陝者莫及也三年春
召還加太子太保與王文並掌都察院明年秋以疾致仕卒

列卿紀云贈太保謚僖敏天順七年詔官其子伸為刑部照
年六十八

磨明史

伊恒字宗有其先汴陽人宋建炎間始居蘇父彤以閭右徙京

師恒好學善書永樂中簡侍東宮洪熙初擢工部營繕所正

與修撰金問同被命待詔思善門進尚寶少卿景泰中致仕

卒年八十餘恒為人恭敬靜退不與時競時稱長者姑蘇恒

弟悌字宗性究心理學言動有矩則子溥字紹方讀書工詩

待族人有恩子乘官四川僉事溥年八十五猶日吟詩展卷

不釋徒步陟山巔不倦自號天關山樵每荷薪歸倦則以薪

易酒與田翁野老班荆而坐酒酣撫掌浩歌掀髯長嘯不知

身膺章服也所著詩曰伐柯吟祝允明傳恒從子侃字士剛宣德

丙辰進士由庶吉士授工科給事中多所建白年僅三十二

卒劉鉉誌

謝文彥字彥達郡人七世祖景初自有傳子孫世居吳樂安里

中有張公藝之風父祐生元季冲夷守道入國朝以壽終文

彥孝弟執義母嬰末疾保之如嬰兒欲有行則擁抱以往踰

十年無少懈事兄極恭順白首同服食子源孫會朴會子昂

朴子勲昂子雍穆能世其德徐禎卿祝允明記其事王志堅府志稿

張益字士謙吳縣人少長京師登永樂乙未進士選庶吉士授中書舍人轉大理評事與修宣廟實錄書成遷翰林修撰進侍讀學士入內閣典機務正統末死土木之難贈翰林學士謚文僖益爲人清淳端謹文章圓熟對客數千言援筆立就楷書亦工初益與夏景同年及見陳嗣初王孟端俱喜作文寫竹後景見益作石渠閣賦出已上遂不復作文益見景竹妙絕亦不復寫竹竟各以其所能名世

姑蘇志 明史附見 王綬傳作上元人

顧惟敬吳縣人永樂中以薦授中書舍人累陞大理少卿初仰瞻得罪用事者意在薛瑄及瞻詞不連惟敬惟敬曰吾與瑄瞻同寮事得分治豈可使二人獨蒙其罪因自請逮治願與

俱謫然迄無所坐止降四川知州未幾乞歸家居以禮自持

不妄交際年八十餘終

姑蘇志

張勗字勉夫吳縣人父庸永樂甲申進士爲遂平知縣改灤州學正勗侍學於灤永樂丁酉中順天鄉試授江都訓導秩滿用薦試上國觀光賦陞監察御史知無不言嘗出按山西體察民隱密封奏之其言激切忌者媒以他事欲陷以死宣宗知其寃卒保宥之陞廣西右叅政丁母憂歸卒年止四十九

姑蘇志

錢紳字孟書其先自泰州徙吳父中善琴紳少讀書修行與表兄陳繼連居一時儕輩數人各以所能更互辨難以相資益

後領鄉薦授本府學訓導陞鄞縣教諭平生無世情與人無
疇畦家藏書甚富多手自抄錄姑蘇志時有錢腴字時用與紳
同姓為昆弟亦有文紳弟纓亦領鄉薦仕靖安州同知杜啓人物
傳

賀廉字以清吳縣東洞庭人邃於易永樂癸卯中京闈第二授
連江訓導校課生徒終日不倦陞代府紀善為人簡嚴屢以
抗言忤當道故官不達終福建按察知事家居以經義教授
鄉里多所造就子元忠字澤民成化壬辰進士授行人擢御
史巡視漕河又按廣東出為河南僉事遷雲南副使以疾乞
歸元忠執操堅定面目嚴冷在臺時獨持紀綱嘗言吾知有

國法不知有他家居雖子弟不敢媠見敝衣惡食雖宴客亦

不肯隨俗奢靡卒年七十八

姑蘇志參
王鏊誌

陳紹先字宗述吳縣人為文簡質書亦清媚領永樂癸未鄉薦
宣德初授荊州府學教授遼王貴烺奏授紀善有所諫諍不
納謝歸以筆硯自食人購之不輕與年至九十時長洲沈貞
吉恒吉兄弟俱壽與紹先優游山澤閒稱遺老焉又三年卒

劉鳳先賢傳 按紹先
元處士深之孫植之子

吳惠字孟仁東洞庭山人宣德丁未進士初洞庭未有登第者
自惠始授行人奉使占城涉海七日遇颶風同行者倉皇莫
措惠神色不變為文祭禱風濤頓息使還擢桂林知府時義

寧峒蠻結湘苗煽亂三司議進兵討之惠請先招諭乃單車親抵其峒開誠慰撫蠻遂服武岡州盜起宣言推義寧峒主爲帥義寧蠻畏惠其主自出訴武岡盜計遂衰在郡十年陞廣東叅政致仕惠性慷慨疏財篤義居官三十年田廬不改其舊家居日飲酒賦詩尤善行草子鳴翰風流俊逸詩文清麗尤精小楷累困場屋以卒

姑蘇志

范希正字以貞吳縣人宣德三年舉賢良方正授曹縣知縣有奸吏受賕希正按其罪械送京師吏反誣希正他事坐逮曹民八百餘人詣京白通政司言希正廉能橫爲奸吏誣枉侍郎許廓以公事過曹曹父老二百餘人遮道稽顙泣言朝廷

奪吾賢令事並聞帝乃釋希正使還縣正統十年山東饑惟曹以希正先積粟得無患大理寺丞張驥振山東聞之因請升曹縣爲州而以希正爲知州從之時州民負官馬不能償多逃竄希正節公費代償九十餘匹逃者皆復業吉水人誣曹富民殺其兄連坐甚衆希正密移吉水按其人姓名皆妄事得自治曹二十三年歷知州再考乃致仕

明史

杜瓊字用嘉吳縣人生一月而孤母顧育而教之長從陳繼學博綜古今爲文和平醇實而必本乎理詩尤沈著古雅有風致閒寫山水秀潤可觀性至孝痛父早亡念不得見從人問知其容儀往往形諸夢寐以父名玉終身諱之嘗割股已母

蘇州府志 卷五十一
疾有司將上其孝瓊曰此豈得已邪唯母節未白可念耳有
司以聞遂得旌其母每求賢詔下有司輒以瓊應皆辭不就
雖介特有守而不爲過矯之行所居近朱長文樂園其東有
原學者稱東原先生年七十九卒三吳交從會葬者千餘人
門生因私謚曰淵孝先生所著有東原齋卷紀善錄耕餘雜

錄

吳寬表

諸質字叔義吳縣人由舉人爲永年教諭改慶元遷國子學錄
進監丞擢翰林編修仍理監職以憂歸遂請老卒質爲人誠
信端直每事審義而行恂恂引退若懦夫至論事裁決侃然
不撓陳敬宗爲祭酒剛嚴少許可質以事請輒降顏譚講質

居錄常攝丞居丞常攝堂事同輩嫉之伺察終無疵可指同
邑夏瑜字公瑾由進士累官考功郎中居官請託不行爲用
事者所誣謫戍雲中景泰初遇赦復職致仕天順初再徵以
疾不起卒於家爲人朴茂清慎時稱爲長者又有長洲鄭鋼
字德新旣領鄉薦母亡十年不仕正統乙丑授趙州學正遷
吉安府教授再遷寧王府長史致仕操履端潔經學精醇教
人有古誼二學至今祀之瑜鋼與質雖先後不一時而人並
以厚德同稱

姑蘇志

徐有貞字元玉初名瑄吳人宣德八年進士選庶吉士授編修
爲人短小精悍多智數喜功名凡天官地理兵法水利陰陽

方術之書無不諳究時承平既久邊備媮惰而西南用兵不息理以爲憂正統七年疏陳兵政五事帝善之而不能用十二年進侍講十四年秋熒惑入南斗理私語友人劉溥曰禍不遠矣亟命妻子南還及土木難作郕王召廷臣問計理大言曰驗之星象稽之歷數天命已去惟南遷可以紓難太監金英叱之胡濙陳循咸執不可兵部侍郎于謙曰言南遷者可斬也理大沮不敢復言景帝卽位遣科道官十五人募兵於外理行監察御史事往彰德寇退召還仍故官理急於進取自朔南遷議爲內廷訕笑久不得遷因遺陳循玉帶且用星術言公帶將玉矣無何循果加少保大喜因屢薦之而是

時用人多決於少保于謙理屬謙門下士遊說求國子祭酒謙爲言於帝帝曰此議南遷徐理邪爲人傾危將壞諸生心術理不知謙之薦之也以爲沮已深怨謙循勸理改名因名有貞景泰三年遷右諭德河決沙灣七載前後治者皆無功廷臣共舉有貞乃擢左僉都御史治之至張秋相度水勢條上三策一置水門一開支河一濬運河詔從其言於是大集民夫躬親督率治渠建閘起張秋以接河沁河流之旁出不順者爲九堰障之更築大堰楗以水門閱五百五十五日而工成名其渠曰廣濟閘曰通源事竣召還佐院事帝厚勞之復出巡視漕河七年秋山東大水河堤多壞惟有貞所築如

故有貞乃修舊堤決口自臨清抵濟寧各置減水閘水患悉平還朝帝召見獎勞有加進左副都御史八年正月景帝不豫石亨張軏等謀迎上皇以告太常卿許彬彬曰此不世功也彬老矣無能爲徐元玉善奇策盍與圖之亨卽夜至有貞家聞之大喜曰須令南城知此意軏曰陰達之矣令太監曹吉祥入白太后辛巳夜諸人復會有貞所有貞升屋覽乾象亟下曰時至矣勿失時方有邊警有貞令軏詭言備非常勒兵入大內薄南城毀牆入請上皇登輦遂升奉天門復位卽日命有貞兼學士入內閣參豫機務明日加兵部尙書有貞謂亨曰願得冠側注從兄後亨爲言於帝封武功伯兼華蓋

殿大學士掌文淵閣事賜號奉天翊衛推誠宣力守正文臣祿千一百石世錦衣指揮使給誥券有貞遂誣少保于謙大學士王文殺之內閣諸臣斥逐畧盡陳循素有德於有貞亦弗救也事權盡歸有貞中外咸側目而有貞愈益發舒進見無時帝亦傾心委任有貞旣得志則思自異於曹石窺帝於二人不能無厭色乃稍稍裁之且微言其貪橫狀帝亦爲之動御史楊瑄奏劾亨吉祥侵占民田帝問有貞及李賢皆對如瑄奏有詔獎瑄亨吉祥大怨恨日夜謀搆有貞帝方眷有貞時屏人密語吉祥令小豎竊聽得之故洩之帝帝驚問曰安所受此語對曰受之有貞某日語某事外聞無弗聞帝自

是疏有貞會御史張鵬等欲糾亨他罪未上而給事中王鉉洩之亨吉祥二人乃泣訴於帝謂內閣實主之遂下諸御史獄併逮繫有貞及李賢忽雷雹交作大風折木帝感悟重違亨意乃釋有貞出為廣東參政亨等恨未已必欲殺之令人投匿名書指斥乘輿云有貞怨望使其客馬士權者為之遂追執有貞於德州并士權下詔獄榜治無驗會承天門災肆赦亨吉祥慮有貞見釋言於帝曰有貞自撰武功伯券辭云續禹成功又自擇封邑武功禹受禪為帝武功者曹操始封也有貞志圖非望帝出以示法司刑部侍郎劉廣衡等奏當棄市詔徙金齒為民亨敗釋歸田里成化初復冠帶閑住放

浪山水間十餘年乃卒有貞初出獄時拊士權背曰子義士也他日一女相託金齒歸士權時往候之絕不及婚事士權辭去終身不言其事人以是薄有貞而重士權

明史

施槃字宗銘吳縣洞庭山人幼警敏異常兒既長不屑就家人生業奮志於學從父游淮陽就師受經歸補縣學生正統三年領鄉薦明年試禮部皆前列廷試第一授修撰年甫二十三既入翰林日讀中秘書力學篤行為楊溥所重未踰年卒

天下傷之

姑蘇志

張淮字豫源吳縣人少業舉子一試鎖院即棄去家貧落魄天才豪宕頃刻千百言合肥徐誌以詩自負憫然謂吳無人眾

中自誇蘇臺覽古之作淮援筆屬和立成二章皆出意表徐
 噤不敢復言明日遁去嘗燕一富人家牡丹盛開主人謂曰
 子能用中峯梅花詩韻賦百篇乎淮信筆成五十首笑曰詩
 腸枯矣亟呼酒沃之日未晷竟成百篇又回文一首人以爲
 神性嗜酒朝暮不離杯勺沈醉墮水而死時有老儒陳體方
 者亦嗜酒有索詩者醉之以酒輒有佳句將死頭戴野花肩
 輿徧游田閒狂醉三日而逝其子韶字大和縱酒工詩名亞
 於淮一夕醉死

列朝詩集

劉昌字欽謨吳縣人少穎敏過目成誦弱冠中正統九年鄉試
 第一明年會試第二對策忤執政抑置二甲景泰二年授南

京工部主事時詔修宋元史昌與崑山張和在選中史事寢
 復舊任歷員外郎中出爲河南提學副使遷廣東左參政內
 艱歸服闋卒於家昌博學多聞勤於纂述在河南著河南志
 又收集名賢遺文作中州文表他如懸笥瑣錄蘇州續志五
 臺集炎方慟哭記又數百卷子嘉緒字協中亦工詩文早夭
 遺腹子穉孫以書翰名號七芝居士

陳順誌姑蘇志列朝詩集舊府志合纂

奚昌字元啟吳縣人少游鄉校有雋聲正統甲子以易經中鄉
 試七試禮部不中遂易尚書諸經亦皆涉獵酷好作詩每大
 衆中舉手搖足輒爲推敲之狀或見其不利也以是尤之昌
 曰彼不售者豈盡以詩邪後進生得昌指授多取高第年且

五十始中成化己丑進士笑曰吾舉業豈至是始工邪明年卒於京師昌平平生賦詩甚多妻惡其苦吟盡取其稿焚之故其集無傳

姑蘇志

陳僎字汝翼鎰從子景泰二年進士除南京御史有墜馬死者執一人掠服之僎察其有冤色廉得死者故與有怨其家緣此中傷之閱屍果得墜死狀卽日出之行殿火民盜一木有司當以盜內府物斬僎曰行殿非禁中比况煨燼之餘乎竟以減死論嘗巡鹽一商人從他人得其家書轉致之僎曰吾家書顧令汝輩持來邪焚而笞之奸人斂手不敢犯出爲四川僉事天順五年敘州九箐山都長土獠聚衆肆掠朝命都

督同知許貴統卒五萬討之僎前驅入破其寨四十餘賊平建議增設內江等二十二縣悉簿飭吏治修戰備更置關堡以規久遠請免宜賓南溪江安納溪民兵戍松潘者以成長寧罷建昌鹽井之餽運使得專戰守事下所司不盡行明年夾江花溪盜乘閒起擾漢州德陽巡撫陳泰檄僎討平之功未報會敘南猶弗靖巡撫汪浩復強僎往會貴帥議軍事及還舟覆溺死敘州江中年四十五朝野痛悼

徐有貞誌

顧珣字文之吳縣人性廉介舉進士居京師謝絕餽遺以病在告者十餘年未嘗干謁府縣當道者以其貧賤以白金堅辭不納同時進士盛核字汝愚吳江人天順庚辰進士其清介

與珣並皆未受官而卒

姑蘇志

碩亮字寅仲生五月而父伯雍歿鞠於母金遭舅氏累蕩產繼
 值儉人匿所託以女歸亮欲釋怨尋致訟母因卒亮痛焉曰
 吾終不以仇人女為妻遂出之徧游江淮閒力學行義久之
 南還入林屋山奮自刻勵發為文辭聲譽日起學者推之至
 是乃復娶知府況鍾聞其賢建書塾於木蘭堂西延為府僚
 弟子師歷後知府李從智朱勝汪濬凡十五年不廢其教席
 四公欲以才薦亮固止之所著有東齋集家範匡正錄子竑
 字惟遠少勤學焚膏繼晷夜欲睡繫髮帳頂額為之禿登成
 化己丑進士未及授官卒

牛若麟縣志

徐震字德重西洞庭人家世好文少從陳繼學詩有弔項羽廟
 睢陽懷古輓岳武穆詩傳播人口與西蜀晏鐸海昌蘇平唱
 和與十才子之列久之謝賓客歸山中垂簾焚香雖鄰里無
 行跡日賦詩自娛年七十八卒

王鏊誌參列朝詩集

蔡蒙字時中西洞庭人以貢入國學授温州府同知成化戊子
 泰順山中礦賊起朝命中官督兵勦禦會大雨雪官兵凍死
 甚眾眾議募民壯補伍蒙曰彼烏合之眾苟益兵制其死命
 其勢蹙祇激亂耳盍遣官往諭禍福眾推蒙行蒙深入往復
 宣諭賊感悟解散復建議取民之強勇丁眾者立為礦賦長
 領夫採鑿民始無爭樂清田數千頃山潦衝激壞為沮洳公

稅無辦蒙浚渠築塍以時蓄洩俱成膏腴歲饑預儲粟五萬石賑貸秩滿温人赴闕請留陞知本府丁外艱服除授辰州知府又丁內艱補廣西之南寧以疾歸

祝允明撰行狀

陳琦字粹之吳縣人以醫籍居京師登成化丙戌進士授南京大理寺副歷寺正出為江西僉事禁絕請謁禔身刻苦行部攜乾糲所至惟飲水而已廬陵有儒生夜過胡甲被殺官執胡拷掠胡自誣服琦曰豈有殺人而自置於門者訊之則儒生有仇知其夜適胡也殺之胡得釋劇盜數十人白晝剽掠琦出令獲一人者賞若干縱其首厚遇之乃得悉其巢穴掩捕立盡清戎御史蔓引平民入伍琦爭之不得令民自首責

歸農者二百餘家遷貴州副使罷歸初琦在江西都御史李裕家人倚勢占陂澤貧民無所得水琦親詣疏決之還陂於官裕嘆之未發也及遷貴州裕時為吏部見琦名即泚筆抹去之物論譁然宣慰使宋然率軍民抗疏留之不報歸吳中家具蕭然鬻書自給日與學者講解經義有感觸輒發於詩所著有冷庵集琦與長洲朱昂為道義交昂妾施氏被誣坐死刑先懷妊產子於獄琦入郡庭索香火為誓於天白其枉出之所生子即都御史純也

王鏊誌參姑蘇名賢小紀

顧福字天錫吳縣周山人父以工籍隸大興登成化丙戌進士授刑部主事錦衣千戶吳綬勢甚薰灼勘獄者皆往受成議

福獨不往會下詔獄遂摘其疵誤出為永州府同知部檄徵
 芽茶香草福計合藩所徵上疏請停之遷知吉安府承前政
 太猛稍濟以寬勑理繁錯條緒畢舉擢河南叅政分守南陽
 宗藩軍校多不戢每用理斷亦無怨辭招撫流移復業者四
 千餘口有郡人在言路者私請弗獲陰媒藥之遂致仕福性
 孝友居母喪廬墓三年事兄_禮甚謹嫂欲析居即遜於外泣
 告於兄乃得歸然猶引咎自責未嘗語人弟祿亡恤其嫠俾
 不貳志後旌為節婦友人潘郎中死撫其子如己子比長留
 為贅壻趙知府歿又以次女妻其子其篤厚如此

李東陽墓表

張習字企翺吳縣人成化己丑進士授禮部主事歷員外郎出

為廣東提學僉事喜為古文詞尤喜搜葺郡中遺文故實一
 時號為博雅前輩文集多所梓行嘗纂蘇州志未成而卒初
 習父曉初中年無子嘗娶一妾既成禮疑而訪之乃一教官
 之女也父死無以歸故鬻之曉初令與其妻同宿養之如己
 女擇良人嫁之未幾而習生

姑蘇志

周庚字原已初名京吳縣人家世業醫而庚喜讀書工古文詞

隱居養親初無仕意成化中以名醫徵辭不獲勉強赴京簡
 入御藥房尋授御醫遷南京太醫院判卒庚為人清慎文雅
 狀貌瞿然雖官為醫而業文不廢其詩沈鬱腴豐有奇氣尤
 善行楷然皆不苟作

姑蘇志

賀甫字美之其先自蜀徙吳父承宗字宗正隱居教授博學多聞尤通五行家言甫剛明介特有通變才以老儒致產千金持邦人風俗之柄者數十年有感樓詩集子恩字其榮成化四年舉鄉試第一早卒

列朝詩集
叅舊府志

徐庸字用理吳郡人采輯永樂至正統四代之詩為湖海耆英集十二卷鄭亮為之序同時有王越字孟南孫寧字繼康俱長洲人談震字克威盛箴字仲規張野字君文俱吳縣人皆

以詩名 列朝詩集

吳琳字廷章吳縣人成化壬辰進士授南京刑部主事歷員外郎郎中畏慎自持書獄辭務在寬全不作重劾按人尤恥趨

競歷十八年始遷貴州叅議弘治初以慶賀入都卒琳性善

容人有犯不校人有負之無怨言最著長厚名 楊循吉傳

王鏊字濟之吳人父琬光化知縣鏊年十六隨父讀書國子監諸生爭傳誦其文侍郎葉盛提學御史陳選奇之稱為天下士成化十年鄉試明年會試俱第一廷試第三授編修杜門讀書避遠權勢弘治初遷侍講學士充講官中貴李廣導帝遊西苑鏊講文王不敢盤于遊田反覆規切帝為動容講罷謂廣曰講官指若曹耳壽寧侯張巒故與鏊有連及巒貴鏊絕不與通東宮出閣大臣請選正人為宮僚鏊以本官兼諭德尋轉少詹事擢吏部右侍郎嘗奏陳邊計言昨火篩入寇

蘇州府志 卷五十二
大同緣邊諸將皆嬰城固守無一人敢當其鋒者臣竊謂今日嬖倖亂政功罪不明委任不專法令不行邊圉空虛此人心所以日懈士氣所以不振望陛下大奮乾剛時召大臣咨詢邊將勇怯有罪必罰有功必賞專主將之權起致仕尚書秦紘爲總制節制諸邊提督右都御史史琳坐鎮京營遙爲聲援厚恤沿邊死事之家召募邊方驍勇之士用聞以攜其部曲分兵掩擊出奇致勝寇必不敢長驅深入從之又言宜倣前代制科如博學宏詞之類以收異才六年一舉尤異者授以清要之職有官者加秩數年之後士類濯磨必以通今學古爲高脫去謏聞之陋時不能用尋以父憂歸正德元年

四月起左侍郎與韓文諸大臣請誅劉瑾等八黨俄瑾入司禮大學士劉健謝遷相繼去內閣止李東陽一人瑾欲引焦芳廷議獨推鏊瑾迫公論命以本官兼學士與芳同入內閣踰月進戶部尚書文淵閣大學士明年加少傅兼太子太傅景帝汪后薨疑其禮鏊曰妃廢不以罪宜復故號葬以妃祭以后乃命輟朝致祭如制憲宗廢后吳氏之喪瑾議欲焚之以滅迹曰不可以成服鏊曰服可以不成葬不可薄也從之尚寶卿崔璿等三人荷校幾死鏊謂瑾曰士可殺不可辱今辱且殺之吾尚何顏居此李東陽亦力救璿等得遣戍瑾銜尚書韓文必欲殺之又欲以他事中健遷鏊前後力救得免

或惡楊一清於瑾謂築邊牆糜費鏊爭曰一清爲國修邊安
得以功爲罪瑾怒劉大夏逮至京欲坐以激變罪死鏊爭曰
岑猛但遷延不行耳未叛何名激變時中外大權悉歸瑾鏊
初開誠與言開聽納而芳專嬖阿瑾橫彌甚禍流縉紳鏊不
能救力求去四年疏三上許之賜璽書乘傳有司給廩隸咸
如故事家居十四年廷臣交薦不起世宗卽位遣行人存問
疏謝因上講學親政二篇帝優詔報聞官一子中書舍人嘉
靖三年復詔有司存問未幾卒年七十五贈太傅諡文恪鏊
博學有識鑒文章爾雅議論明暢晚著性善論一篇王守仁
見之曰王公深造世未能盡也少善制舉義後數典鄉試程

文魁一代取士尙經術險詭者一切屏去弘正閒文體爲一

變明
史

劉纓字與清其先清江人以尺籍隸蘇州衛登成化十四年進
士授武陵知縣丁母憂服闋補知滕縣以治最名爲河南道
御史出按福建沙縣民陳富誣鄧釗殺父獄已具纓視案疑
之密訊諸里人則釗父實以負債不能償而自刎論富如法
釗得釋莆田有隨母出嫁割股療其繼父者有司以孝聞纓
曰虧父體以濟父仇孝如是乎得不罪幸矣又按廣東東莞
豪民張政家海澳通番殖貨夤緣公牒得捕盜海上欲奪市
珠者十人利悉誣爲盜纓讞得其情立出之抵政死指揮倪

鳳以捕盜橫甚聞其陰養死士急之恐變以他事誘而殺之
 鎮守中官妄奏俘男千數可官以給用詔令解京乃鬻良人
 以充腐三百人斃者強半又買之海南纓聞亟渡海抵瓊崖
 諸屬還至德慶見其黨方載小兒五百於舟中纓驗非俘獲
 即日散遣以劾外戚忤旨孝宗杖而釋之擢太僕寺少卿進
 右僉都御史巡撫四川居一載以疾歸御史龔元言其練蜀
 事仍起撫四川諸番掠梁新堡纓督諸兵前後俘斬千餘正
 德二年改撫湖廣忤劉瑾逮赴詔獄尋釋還任遷南京大理
 寺卿召為兵部右侍郎進南京刑部尚書致仕卒年八十二

雷禮列
 卿記

纓從孫遠字紹卿好學多聞喜談世務嘉靖中由太

學生官雲南按察司經歷蒞政明決強執不受請託上官重

其才事多倚以成為忌者所中免歸

陳鏊
 誌

伊乘字德載溥子成化戊戌進士授南京刑部主事進員外郎
 居官不苟縱弛而持法甚平尚書張瑄特委重之擢四川僉
 事簡縣盜屈永朋誣引鄒子琴一家八人同劫被劫者亦恨
 鄒故為蜚語動乘卒論出之蓬溪張立仁誣鄰蕭俸爵為盜
 又株繫數十人乘廉得其實釋俸爵等而坐張以誣遂寧劇
 盜董傳與王仕學等聚劫乘訪知安岳孔萬古者族多死士
 善擊刺因召萬古論以大義檄兵同勦賊皆成擒鄰盜望風
 解散秩滿乞終養歸里父歿遂不復出卒年七十六乘平生

嗜學至老不倦所著詩文有古作者風其他編葺廣雋李杜
 詩句圖學古次第郡邑纂類六書考音韻指掌史學撮要及
 皇明風雅等集皆傳世子伯熊字臣舉正德丁卯舉於鄉歷
 深祁二州知州柳州同知所至有聲牛若麟縣志
 楊循吉字君謙吳縣人成化二十年進士授禮部主事善病好
 讀書每得意手足踔掉不能自禁用是得顛主事名一歲中
 數移病不出弘治初奏乞改教不許遂請致仕歸年纔三十
 有一結廬支硎山下課讀經史旁通內典釋官父母歿傾貲
 治喪寢苦墓側性狷隘好持人短長又好以學問窮人至頰
 赤不顧清寧宮災詔求直言馳疏請復建文帝尊號格不行

武宗駐驛南都召賦打虎曲稱旨易武人裝日侍御前為樂
 府小令帝以優俳畜之不授官循吉以為耻閱九月辭歸既
 復召至京會帝崩乃還嘉靖中獻九廟頌及華陽求嗣齋儀
 報聞而已晚歲落寞益堅癖自好尚書顧璘道吳以幣贄促
 膝論文歡甚俄郡守邀璘璘將赴之循吉忽色變驅之出擲
 還其幣明日璘往謝閉門不納卒年八十九其詩文自定為
 松籌堂集他所作又十餘種幾及千卷明史
 張瑋字嘉玉蘇州衛籍成化丁未進士授工部主事分權杭州
 以嚴慎稱進郎中治漕徐州時劉瑾用事其黨縱橫江淮聞
 瑋一繩以法中官過徐者相戒無犯張郎中俄而瑾以蜚語

告變逮繫詔獄酷訊無所得乃以奉使乘肩輿非制戍遼陽
 嘉靖初復故官待次卒居家貧甚晨夕餽爨或不時舉既死
 室無一錢府縣為賻襚乃克殮鄉人士斂資葬之瑋纖弱不
 能勝衣當被逮時貫索關械荷重校暴烈日中市人旁睨竊
 歎莫敢近數日羸竭且死更兩日復蘇事母極孝赴戍時母
 年八十相持慟哭謂無更見期日夜悲泣比歸母猶健逾年
 乃卒人以爲苦節之報云

文徵明誌姑蘇名賢小紀合纂

毛瑄字貞甫成化丁未進士授南京工科給事中中官薄琮橫
 甚瑄劾之論死安遠侯柳景誣構兩廣總督秦紘瑄抗疏申
 理有旨景閒住而紘得致仕邱濬博學自信以雄辨濟其說

瑄論其偏私不可在論思之地歷戶兵兩科山東叅議浙江
 叅政致仕林居十年言官數論薦起南京鴻臚寺卿陞太僕
 宸濠反南京戒嚴兵部尙書喬宇集衆議攻守瑄言南京根
 本重地而安慶實爲屏蔽賊乘吾無備直搗九江窺江左宜
 調兵水陸並進宇遂屬瑄督潁泗和陽諸軍爲江表聲援宸
 濠平乃還進南京右副都御史督視江防引年乞骸改撫治
 鄖陽再疏上乃得允瑄沈敏果決長於奏議居官慎刑獄年
 八十二卒長子錫朋嘉靖戊子舉人以孝友稱

文徵明狀方鵬誌合纂

施鳳字鳴陽修撰槃姪隨祖商淮陰勤誦讀嘗經孟子河與儕
 輩閱道傍碑一過歸而書之不失一字倪文僖爲南京禮部


尚書以所業往見文僖驚焉為介於陳御史直夫直夫喜曰
 從吾游者多矣好古不同流俗惟鳴陽一人鳳益潛心理學
 歸吳提學御史戴珊敦遣入試以病辭錢學士溥以經明行
 修薦亦不就於墓所授徒闢園鑿池養魚種樹食貧礪行不
 以干人孝友恭慎家人輩皆化之初鄉有狂悖數犯鳳凰不
 校益厚之其人卒悔改晚構一亭於松竹間客至相與宴飲
 怡然終日王鏊為作東岡高士傳王鏊東岡高士傳
 杜啟字子開瓊子弱冠肆力經史百家凡禮樂兵農靡不通究
 成化丁未登進士授長垣知縣黃河決築長隄分導河流由
 古北道入海有強寇數百持械臨城啟命大開門鳴鼓集眾

令居民木石填街各蓄水於門潛令勇士三百餘間道出為
 外應寇避匿縣賴以全擢南京御史出為福建僉事致仕屏
 居讀書不謁當道王鏊修蘇志啟與長洲朱存理浦應祥筆

削居多劉纓誌

蘇州府志

卷五十二



Faint vertical text columns within the ruled area, possibly bleed-through or ghosting from the reverse side of the page.

文化乙丑

